



西江志卷第九十

人物 二十五

饒州府 四

明二

程楷字正之樂平人性警敏為文尚奧古自成一家成化丁未會元改翰林院庶吉士授編修預脩會典尋卒 林志

張憲字廷式德興人成化進士授考功主事歷郎中凡十有四年廉慎公勤如一日陞山東左叅政行部所至興廢典釋冤繫陞浙江布政使閱庫藏主吏報羨銀若干封識表之積官工部右侍郎總理易州山廠止用公差例日廩五升省八郡常供之餽簿書關防宿蠹十去七八還莅部事會武宗即位諸邊告急戶部言鹽法久壞請遣重臣釐正



遂兼都察院左僉都御史以行親歷諸場災瘡無所避事
且就緒劉瑾專權議革巡撫召還越二年改南京都察院
陞南京禮部尚書瑾終惡其不附已月餘內批致仕人物
志

彭程字萬里鄱陽人成化進士授御史巡視京城降人雜處
多為盜事發則投戚里奄豎為窟穴程每先機制之有發
輒得巡鹽兩浙代還巡視光祿上疏言臣適見光祿造皇
壇器皇壇者先帝修齋行法之所陛下即位此類廢斥盡
何復有皇壇煩製器頃李孜省繼曉輩倡邪說而先帝篤
信之者意在遠希福壽也今二人已伏重辟則禍患之來
二人尚不能自免豈能福壽他人請治所司逢迎罪時帝
無皇壇造器之命特光祿姑為備帝得程奏大怒以為暴

揚先帝過失立下錦衣獄付程刑部定罪尚書彭韶等擬
贖杖還職帝欲置之死命擊之韶等復疏救程子尚三上
章乞代父死不聽並家屬戍邊程母李氏年老無他子叩
闕乞留侍養不許子尚隨父戍所遂舉廣西鄉試明年帝
念程母老放還其後劉瑾亂政追論程巡鹽時稍虧額課
勒其家償程死久矣止遺一孫女罄產不足則竝女鬻之
行道皆為流涕

明史藁

干準字世範安仁人領鄉舉歷長沙衛輝判有惠及民嘗吞
蝗蝗悉死民得有秋遷松江同知罹火災拜禱遂息部使
者薦之秩滿乞致仕陞知本府俾仍還蒞事三日去時人

高之人物志

舒清字本直德興人成化進士授工部主事裁抑浮費中貴

憾之抽分浙江權政爲民築堤以禦水患號舒公堤尋遷
貞外郎奉差適徽府於均州掘地得錢十八萬緡奏入公
帑自營繕郎中陞河南叅議屬河泛城灌巡守諸臣咸求
舟自濟清獨取舟焚之衆始一力防塞二日水降城卒無
虞歲饑請邀運米百萬分給一省全活甚衆尋陞四川叅
政立遞減法以便民轉廣西左布政先是徭徭叛服不常
清單舸諭以恩信皆懼伏無敢動駕帖取庫藏銅鼓槌諸
物清以節用愛人疏進又取古琴諸物清以不貴異物疏
進田州土官承襲具謝金斥出備軍餉民蠻懷附尋以疾
乞休歷仕三十餘年清約如寒素著有直菴集行世 林志
孫弁字文冕浮梁人成化進士知龍游擢御史累疏論天下
大計風裁凜然按廣東南畿遷浙江僉事弁初出龍游有

豪書里門云虎去山猶在弁續曰山深虎又來後果以僉
事至邑剪除殆盡 人物志

祝瀾字有本德興人成化進士授兵科給事中立朝剛直敢
言初論彗星之變繼論尚書王恢李秉都御史韓雍高明
皆負天下望不宜閒處言甚剴切嘗夜草奏指摘宮闈燈
忽爆滅至再家人慮不測勸瀾止瀾艱然竟持奏上之廷
杖得不死謫安州判尋遷國子監丞上廟祀議以聖賢像
宜從明初定制祀木主顏無繇曾點孔鯉以父列於廡顏
淵曾參孔伋以子坐於殿尊卑失倫殊爲未當先師父母
未沾褒封似爲缺典請褒封叔梁紇仍于大成殿東別立
一廟祀之以顏無繇曾點孔鯉配享左右弁罷荀況公伯
寮從祀通行天下郡學遵守疏上下禮部議不合再謫雲

南廣西府經歷瀾慷慨尚氣節不以死生禍福爲意後其廟議皆已採行瀾爲人多大節爲諸生時聘舒氏女亡何女雙盲其父母欲改適瀾不可竟娶瞽女與之終身林志程廷珙字獻之浮梁人性孝友居母喪三年不御酒肉成化進士授南京吏部主事進郎中陞福建叅議榜禁不法三十餘事開渠建陽以利灌溉福寧疫厲大作力賑之由廣西叅政進布政使時蠻寇甚猖獗渠魁黃鑑成等勦擒殆盡又東闌吞併往諭禍福隨解土官爭長以法定之母敢議謝以金二甕卻不受踰年竟卒於粵林志

按程廷珙所著有貞菴集十二卷廣西省志八卷

孫需字孚吉原貞之孫成化進士爲常州府推官擢南京御史偕同官劾僧繼曉忤旨予杖出爲四川副使弘治中累

官右副都御史巡撫河南歲凶汴河齧城需募民築堤堤成饑者亦濟鎮守中官劉瑯貪橫奸民赴瑯訟需論之成瑯跪請執不聽瑯恨次骨會大臣子橫於鄉需裁約之瑯與謀改需撫陝西寇大入寧夏用楊一清代需還以故官撫治鄖陽撫輯流民占籍者數萬正德二年召爲南京兵部右侍郎就擢禮部尚書劉瑾惡需追論撫河南時事罰輸米於邊勒令致仕瑾既誅起需代張憲爲南京工部尚書就改刑吏二部十三年引年乞休賜勅乘傳去嘉靖初卒謚清簡需在蜀時族弟入其境檄有司械送歸人以此議其薄然需故以廉約稱明史蒙

按孫需明史蒙附見孫原貞傳後據人物志所著有冰檠橐奏議都御史盛應期稱其歷仕三朝名節無玷云

虞訥樂平人五世同居有家範人無間言事聞旌之 林志

戴璉字廷獻浮梁人力學希古登成化丙戌科人稱為五經進士授大理評事未究厥施而卒所著有知非集 同上

潘葵字日臣浮梁人幼孤有志性理之學事母孝廬墓三年選補邑庠苦志力行始終不渝所著有皇極數傳洪範本傳易思得錄曆法世論深衣說石室集諸書 同上

蘇章字文簡餘干人成化進士授兵部主事以星變言事謫姚安通判陞松江同知後知延平府案上大書忍字以自警又建寶章閣創道南祠合祀楊羅李三大儒漳平寇作躬劄永安設謀勦捕賊不敢窺擢浙江參政嬰風疾不起 人物志

按蘇章于憲宗朝上疏請誅李孜省僧繼曉因而得罪

事見李俊傳中今采人物志補史傳所未備

彭福字綏之樂平人成化進士知泰州歲例泰解邊馬五十三匹途多斃解者毀家償之又歲輸軍豆苦於遠運福皆奏免之守備昌姓者嗾家奴倚勢支鹽福命拽下獄奏劾違制遂落昌職泰遂稱治福性剛介遇事敢為權幸私干壁立不少動以故得謗引年乞休歸之明年泰民赴京奏起之不報 府志

祝徑字直夫德興人登進士初授給事兩奉使藩餽遺不受疏阻中貴李廣之乞地及巨璫李興之再入劾罷漕運總督張緯奏定勲臣侯伯祿之常額以言事下獄尋釋為河南叅政查巨盈庫藏掘發地中瘞銀舊無稽查者一一籍之官督建汝王府第內侍貪酷害民徑緝之以法修防黃

河穿地築堤通徐州呂梁二洪有功卒于官 人物志

董旻字子仁樂平人成化進士擢兵科給事中旻風節自礪時萬太妃擅寵昭德宮率諸垣指陳不報偕御史林誠連章終論之詔撻於闕廷幾死起益振烈指論冢宰姚一夔內閣商輅無所貸戊戌琉球中山王請封爲正使贐金固卻之不得歸以聞詔使之受擢吏科都給事中憲皇帝久虛主壘時孝宗已在潛邸人畏昭德莫敢以爲言會星變因倡論始正儲副然危機已峙於茲以侍吏誣謫知雲南之石城舊雲南雜蠻獠動以戈戟逞乃說以禮義翕然從教孝宗即位起擢雲南左叅議以父憂改四川 同上

程勇字文憲樂平人以賢良方正應詔擢山東御史妖婦唐賽兒聚衆作亂命勇監軍有洗蕩功奏聞隨擢僉都御史

青州立生祠祀之 同上

張吉字克修餘干人成化進士除工部主事時李孜省僧繼曉以左道進會星變吉上疏顯劾二人罪其黨欲撫吉過不可得諷吏部尚書尹旻謫吉景東通判土官陶洪遣子榮來學民漸知化遷肇慶同知築堤防水亘三縣又爲竇以殺衝決民德之號張公隄遷梧州知府崇正學飭文廟樂舞政教並行陞廣西兵備副使以府江東西二賊相爲犄角而東賊慄悍尤甚遂併力於東數月之間斬獲甚衆西賊聞之亦皆自戢府江以寧後考績入京有更張其法者賊復乘時而起鎮巡以聞詔促吉還任在府江七年武廟御極邊方侵擾陳便宜策以貴州布政使養疾家居卒著有三朝奏議陸學訂疑貞觀上斷諸集子侏進士御史

有父風 林志

按吉所著尚有古城集六卷

余祐字子積鄱陽人年十九師事胡居仁居仁以女妻之弘治進士為南京刑部員外郎以事忤劉瑾落職瑾誅起為福州知府鎮守太監市物不予直民羣訴於祐慰遣之云將列狀上聞鎮守懼稍戢然恚甚遣人入京告其黨曰不去余祐鎮守不得自遂也然祐素廉撫拾竟無所得未幾遷山東副使父憂服闋補徐州兵備副使中官王敬進鮮多挾商船與知州樊準指揮王良詬良發其違禁物敬懼詣祐求解祐不聽敬誣奏準等毆已遂并逮祐謫南寧府同知稍遷韶州知府投劾去嘉靖初歷遷雲南布政使以太僕卿召未行改吏部右侍郎祐已先卒

明史藁

黃黎洲曰先生之學墨守敬齋在獄中著性書三卷謂程朱教人以誠敬為入門乃其論性則兼理氣而言深闢性即理也之說蓋分理與氣截然為二并朱子之意而失之矣

李曉字未夫浮梁人天資高敏早歲放浪不羈年近四十赴省試聞有講學會往赴一聽不覺汗下沾背歸遂翻然自勵旋與鄱陽史汝寧遊史嚴毅刻苦踏實為學者也曉謹嚴中有超超自得之趣郡守陳吾德延為諸生講當江陵禁學之日曉竟不輟講以没

人物志

劉璉字廷美鄱陽人弘治進士授刑部主事陞員外郎中每疑獄或廷尉所駁惟璉覆確陞柳州知府時猺獠肆掠都御史應城金率士校討之多璉畫計既而魚峯賊周鑒煽

亂璉率輕甲掩擊值後軍不繼遇害 同上

詹陵字良卿樂平人弘治鄉薦任鄭州學正後改瀘州陞知寧遠縣甫三月政教大張偶感疾因思朱晦翁沒功名語毅然乞休家居益邃於學嘗以主敬為先 同上

史梓芳字景賢鄱陽人孕十五月而生性穎敏博通經史與劉應麟祝世祿同硯席皆以國士期之生平湛心理學授徒必以敦行為先嘗曰士苟能遠聲利薄嗜欲便是真實學問作三畏箴四知銘以自警 同上

王良臣字汝忠德興人戊午舉於鄉時懷玉書院初闢鄒東廓錢緒山後先主盟良臣負笈從之屢上春官因念母春秋高無意仕進朝夕承顏丁丑以母命謁選得景陵學士林以為得師署邑篆素礪冰蘖當路廉其賢交章薦之竟

不起 同上

彭應奎字勉文樂平人弘治乙卯解元穎敏絕倫著作甚多

有白涯文集行世 同上

劉麟字元瑞本安仁人世為南京廣洋衛副千戶與顧璘徐禎卿稱三才子弘治進士除刑部主事進員外郎錄囚畿內平反三百九十餘人正德初進郎中出為紹興知府劉瑾銜麟除官不謁謝甫五月撫前錄囚細故罷為民士民為建小劉祠以配漢劉寵因寓湖州瑾誅起補陝西左參政督糧儲尋遷雲南按察使謝病歸嘉靖初召拜太僕卿進右副都御史巡撫保定六府再引疾歸起大理卿拜工部尚書侍衛軍不給衣履錦衣帥駱安援紅盔軍例以請麟執不可詔量給銀自製後五載一給為常四司財物悉

貯後堂大庫司官出納多侵漁麟請特除一郎官主之賜名節慎庫已上節財十四事汰內府諸監局冒破錢中貴大恨會帝納諫官言停中外雜派工役麟牒停浙江蘇松織造而上供袍服在停中中官吳勲以爲言遂勒致仕家居三十餘年晚好樓居力不能構懸籃輿於梁曲臥其中名曰神樓文徵明繪圖遺之年八十七卒贈太子少保謚

清惠

明史藁

程誥字欽之樂平人弘治進士授刑部主事數決疑獄改工部督臨清關閘尋擢本司員外郎轉虞衡都水時逆瑾專恣諫垣結舌誥與尹之任連名疏劾被瑾中傷出知廣之雷州比至郡海潮溢發蕩析民居捐俸賑濟請免田租之半民賴以蘇

蘇人物志

桂華字子朴安仁人正德癸酉鄉薦姚源盜起華請以賑濟粟募民築城爲捍禦計會寧藩蓄逆謀陰使其腹心兵備王綸羅致華使助已華時居母喪綸旬日三奠其母靈華揣知其情議論必依忠孝綸卒不敢出一語而去天性孝友居喪不用浮屠有古山先生集二十卷行世

同上

桂萼字子實安仁人正德進士除丹徒知縣性剛使氣屢忤上官調青田不赴用薦起知武康復忤上官下吏嘉靖初由成安知縣遷南京刑部主事世宗欲尊崇所生廷臣力持已稱興獻王爲帝妃爲興國太后頒詔天下二歲矣萼與張璁同官揣知帝指乃以二年十一月上疏請稱孝宗曰皇伯考興獻帝皇考別立廟大內正興國太后之禮定稱聖母復得席書方獻夫二疏帝大喜明年正月手批議

行初議禮諸臣無力詆執政者至萼遂斥為不道恣肆無忌朝士尤疾之羣起排擊帝心不為動遂召為翰林學士卒用其言萼自是受知特深尋進詹事兼翰林學士議世廟神道及太后謁廟禮復排廷議希合帝指帝益以為賢進禮部右侍郎兼官如故六年九月改吏部左侍郎是月拜禮部尚書兼翰林學士故事尚書無兼學士者自萼始甫踰月遷吏部尚書賜銀章二令密封言事與輔臣埒明倫大典成加少保兼太子太傅萼既得志日以報怨為事王守仁之起也萼實薦之已銜其不附已力齟齬及守仁卒極言醜詆奪其世封諸卹典皆不予七年二月命以本官兼武英殿大學士入參機務楊一清為首輔持重萼好紛更遂不相能帝已疑萼給事中陸粲極論其罪并言萼

家人吳從周序班桂林居間行賄事奏入奪官以尚書致仕無何霍韜兩疏訟萼言一清與法司構成萼贓罪一清遂去位明年四月萼還朝仍參機務萼初銳意功名不恤物議驟被摧抑氣為之懾不敢復放恣居位數月屢引疾十年正月得請歸卒於家贈太傅諡文襄

明史藁

按桂萼所著有奏議八卷及皇極論禹貢圖輿地圖說張欒字叔喬德興人正德進士授刑部主事會瑾用事左遷鳳陽教授瑾敗起歸德同知署開封府事築城禦寇有功以薦知柳州府陞南京刑部員外所著有太極圖解

費文

憲摘藁

盧瓊字獻卿浮梁人正德進士授固始令固始方中寇瓊至而撫集之飭政興材百廢具舉擢監察御史世宗入瓊疏

爭大禮其略曰陛下在興國則爲興獻王嗣繼大統則爲孝宗後雖長子不得爲人後不能斷之於先而今可改乎上怒廷杖幾斃謫戍遼東十年乃赦歸其後臺省交章論薦報可瓊固辭年八十一卒贈光祿卿

人物志

張鉞字文輔安仁人正德進士初宰遂昌江西姚源盜發四境騷動捧檄率兵進討寇遁擢御史巡按廣西露章劾逆瑾直氣不磨巡撫雲貴邊務調停居官四十餘年以清廉著官至工部侍郎會九廟災自陳致仕

同上

余廷瓚字伯獻鄱陽人第進士官行人司司副正德己卯武宗南巡廷瓚條上十不可皆人所不敢言者疏入上震怒杖於廷下獄既而釋之卒於外嘉靖初遣官諭祭有追念忠誠曷勝悼惜之語

林志

按武宗南巡一時疏諫者舒修撰國裳詞最激烈明史立有專傳余廷瓚疏反覆千餘言其剴切不下於舒獨不得立傳林志所載不詳人物志載其全疏今不具錄王由道字汝充樂平人正德丁卯鄉薦警敏辨博在京醉罵權閹劉瑾被斥著有古狂文集

人物志

舒林字叔喬樂平人正德進士拜御史侃直不撓慨然有澄清志撫臣陶琰軍政不肅抗疏論之宦成清苦如寒微詩文高古士林崇之

府志

李榕字全年鄱陽人好蓄書罷同安教諭歸構一樓宅後俯瞰東湖扁曰玩鷗自題其柱云近湖不與鷗爭水到岸方知我有家徜徉其間讀書澆花老而不倦卒年九十四

人物志

西江志 卷九十一
黎澄字本靜樂平人嘉靖進士選庶常與修武宗實錄改禮
科給事中督學廣西建學造士轉叅議家居力敦孝友沉
酣經史著有春草堂集 同上

余鈞字子振德興人嘉靖進士授推官徵拜山西道御史巡
居庸關劾罷太監劉岑姚正按湖廣發楚府世子諸不法
事權貴忌之謫宿州判歷官刑部郎陞守保定府疏陳四
事曰精選官軍增築城垣招募土兵取回驛站歲饑捐俸
買稻助賑為富民倡再守衢州卒於官 同上

余曠字德明樂平人嘉靖進士授行人擢兵科給事中時銓
部許讚挾權市私曠連章劾讚及選司李棟竝罷去又直
疏邊方撫臣龍大有樊繼祖等貪冒失機之罪薦宿望名
臣曾銑韓邦奇朝論壯之以直忤時謫浙江布政司都事

尋擢建陽尹治功卓異累遷按察司僉事會安溪九龍洞
劇盜嘯聚劫戮滋蔓曠調度官民兵進逼諸險出奇拏擊
賊魁陳日輝就擒閩人士為勒平寇碑頌功德官至副使

豫章書

曹天憲字恒卿浮梁人嘉靖進士知新昌剛廉不習脂韋躬
先節儉禁絕饋遺燕飲裁省夫役每延儒生至寢室蔬食
相對蕭然如寒士著賦役成規勒之石歲大旱布袍芒履
烈日中出舍僧寺凡閱月為文責城隍至欲自焚以謝百
姓已而雨浹歲登民皆德之擢兵部職方主事從侍郎范
璉巡邊凡衝隘要塞躬履畫圖至古北口見其地陡絕險
扼而守備單弱請亟更立重鎮尋遷武定兵備再遷四川
叅議以抗直忤御史議調歸 同上

吳宗吉浮梁人弱冠鄉薦令清河值河泗水患民多逃竄給牛種招徠復業遷蘇州同知九年遷兩浙運同陞貴州黎平知府入覲道卒歷官三十餘年不爲子孫田宅計黎平後守乘其死以庫藏不明陷之移文拘提其子巡按使者係吳人素識其清介歎曰此公九載蘇州止飲蘇水其可誣乎疏豁免之

府志

方逢堯字景雍樂平人嘉靖甲午選貢歷徐聞靈山二縣令所至多惠政在徐聞七年征黎有方畧民賴以安時盜劫罷官於途蔓誣三邑逢堯方覲回廉其枉力爲辨白緝真盜并所掠以報當道悉改成案活冤獄百餘人尋擢南安知州

同上

祝世祿字無功德興人嘉靖甲子舉於鄉諭黃陂以學爲教

已丑成進士令休寧有兄弟訟十餘年不解者世祿曰此未可曲直折也乃係以琅鐺而坐之獄令朝夕同起臥久之遂兄弟如初及選南吏垣礦稅起留都兩廠監駐徽寧燄張甚欲令二千石以下庭謁之世祿取儀註刪定爲平交禮九載考滿陞南京尚寶卿京察降調卒世祿工詩善草書談理獨抒心得人人解頤故講學之士尤思之

志

人物

高美字文中樂平人嘉靖鄉薦知濱州州瀕海地一遇歲歉民輒流移美即隙地建義倉以救荒築漏澤園以掩芻循行以勸農校士練兵政績茂著上特賜劄嘉獎陞刑部郎中

同上

周榮字勉仁樂平人少警慧博學邃易肯綮嘉靖進士官行

西江志 卷九十一
人奉詔督江南三省軍器廩餼外一無所擾轉工部主事
時冬官司匠徒每苦中貴凌制榮不屈權勢卒於官 同上

周禮字時叙樂平人嘉靖進士授工部主事廉慎忠勤歷官

二十年如一日擢福建叅政至閩倭寇竊發奉命專巡海

道設方畧以禦要害地方得寧 府志

章書字弘載餘干人嘉靖進士授南京吏部主事歷員外郎

中陞四川順慶知府時大饑講求荒政民無遷徙屬邑盜

起多方撫綏撫按上其事賜金幣超陞四川叅政改廣西

分守勦平山寇民賴以寧以廣西按察使致仕 同上

胡永和字履初萬年人性醇謹博學沉潛領戊午鄉薦授廣

東肇慶司李廉介明允民懷其德威卒於官鬻婢僕以資

輿櫬鄉里競傳其賢云 同上

舒鰲字子化德興人嘉靖進士授仁和知縣杭例舊有公費

千金鰲盡革之入覲無資遣力回家稱貸冢宰楊公稱其

治行為第一隨擢御史巡按湖廣 同上

舒春芳字景仁鄱陽人嘉靖進士授南刑部主事丁內外艱

服闋補刑部以疾乞歸杜門謝客授徒芝山寺告滿仍補

原官署員外郎擢福建僉事備兵建寧連禦海倭山寇底

靖一方暇日進諸生講析考亭西山之學風其鄉人刊示

東萊官箴以厲屬吏叅政湖廣值景王之國攝綜供億事

集費省陞貴州提學副使春芳天性醇篤口無妄言其學

師法薛河東反身懋求切問近取不為空談所至以學為

政人物志

史桂芳字景實號惺堂鄱陽人嘉靖進士起家歙縣令徵為

南京刑部主事晉郎中出知延平府再補汝寧遷兩浙鹽運使以歸先是嶺表鄧德昌白沙弟子也以其學授傅明應桂芳讀書鹿洞傅一見奇之手書古格言以勗桂芳懼然嚮學之意自此始其後交於羅近溪耿天臺在歙又與錢同文為寮講於學者日力天臺嘗曰平生得三益友皆良藥也胡廬山為正氣散羅近溪為越鞠丸史惺堂為排毒散桂芳在汝寧與諸生論學諸生或謁歸請益即輟案牘對之刺刺不休談畢珍重曰慎無弁髦吾言也激發屬吏言辭慷慨遂平令故有貪名聞之流涕翻然改行郡有孝女不嫁養父桂芳躬拜其廬民俗為之一變其守延平七日憂去而盡革從前無名之費

明儒學案

程良字明輔樂平人嘉靖進士任仁和知縣審徭編却靡費

識王柏之文於里胥中免役就學隨登第富民張洪納徭銀晚出銀山寺偶有鬻桑葉者斃於盜地里以訟洪良據理白洪寃獲真犯於他所其明察多類此

人物志

吳汝新字勉之安仁人舉於鄉進學南雍授德慶州守單車之官德慶古康州地徭獍雜處剽劫為患前此易五守卒不能治汝新至諭以禍福狂逞如故乃練兵設伏覆其巢而滅之一州以寧親老力請終養歸年九十猶好學不倦

同上

王址鄱陽人幼嗜書史能詩事母孝慷慨負氣節嘉靖間試武舉第一守備撫建時流賊自閩向建之新城址提所部兵往值驍騎衝鋒址彎弓一發輒斃賊勢少却亟招兵掩殺賊復振眾寡不敵址猶手刃數人獨持矛轉戰竟日力

竭援絕被獲罵賊不屈遇害 同上

桂秀字子實餘干人邑學生奇傑有學識姚源賊每發人墳墓秀憤其祖墓為所發率子弟倡義兵攻之與賊戰於回跋奮勇陷陣父子及門人俞相等俱死 府志

吳祚字天錫餘干人由吏員授陽朔典史致仕姚源賊猖獗叅政董朴以祚在陽朔從征賀縣賊有功檄領兵三千進攻梁山時天大霧營柵火起官兵大敗祚力戰斬十三人而死賊平贈祚承德郎蔭其子 同上

周輅字乘之安仁人質直敦厚忠孝出於天性以貢授滄州訓致仕家居羣賊掩至抱之擁上馬欲以為謀主輅厲聲曰我讀聖賢書食君上祿豈肯與鼠賊處耶賊百計誘之罵愈厲遂遇害 安志

程嘉行字公敏樂平人學有淵源為文根極理要嘉靖進士擢禮部郎中朝廷儀制皆出其手所著有納菴集 人物志

朱繼忠字以誠樂平人嘉靖進士官至通政司居鄉三十年絕請託著有小川集 同上

章世禎字克昌餘干人嘉靖舉人初任武陵以卓異擢知德州未幾以事移判徐州尋起六合令以治行第一復知徐州治河奏功晉秩奉直大夫致仕 同上

汪柏字廷節浮梁人嘉靖進士為大理評事遷光祿寺丞宰相夏言以文章才品推重之出為廣東海道副使海上有巨寇何姓者為一方害捕擒之歷浙江布政致仕柏所至有風裁淡於嗜慾俸積盡以均之昆弟著有青峯存集 同上

關文振字道充浮梁人博綜文詞尤長於詩以歲貢教授嚴州徵脩福寧州志及寧德縣志所著有詩話文話等書五十餘種同上

金達字德孚浮梁人嘉靖鄉薦丙辰冠南宮廷對第一人諸所撰作雄偉典麗下筆千言立就後以司業致仕著有星橋等集安志

姜金和字節之文詞博雅嘉靖進士廷試第三授翰林編修陞修撰時分宜秉政鄉人競趨之金和在史局淡如也歷春坊諭德南國學大司成疾作予告卒於家同上

孫曉字東白德興人恬退嗜學補邑庠以父尚書清簡公蔭入國學或諷之仕荅曰父以清白仕子以清白隱固不可乎所著有竹坡漫稿讀史尚論西銘蠡見過庭錄同上

陳文衡字惟平鄱陽人隆慶進士授仁和知縣陞刑部主事改監察御史巡按宣大時代藩奪嫡事發或為賂庇文衡執法不少貸會御史劉臺劾江陵被逮文衡大為歎息外調廬州推官江陵敗由南京吏部郎中陞廣東副使備兵羅定歷陞湖廣叅政山東按察使廣西右布政使同上

劉應麒字道徵鄱陽人隆慶進士授禮部主事富宗人重貲求繼親藩應麒執不可當事者銜之出為督學廣東會沙汰例起應麒格不行以疾告致仕三載起廣西督學陞四川叅政遷湖廣臬長浙江左右轄陞應天巡撫遂乞終養起南大理卿再起工部侍郎俱未赴轉兵部侍郎命下先旬日卒應麒居官貞亮公忠有大節所至以清名人物志李頤字惟貞餘干人隆慶進士授中書舍人萬曆初擢御史

清軍湖廣廣西請免土民遠戍祇充傍近衛所軍忤張居正出為湖州知府遷蘇松兵備副使湖廣按察使鄖陽兵變知府沈鈇且得罪頤為白其冤而密殲首亂者以母喪歸起故官莅陝西進河南右布政使擢右僉都御史巡撫順天進兵部右侍郎伯牙入寇督將士敗之羅文谷進左侍郎久之進右都御史在鎮十年威望大著中使憚頤廉正畿民少安二十九年以工部右侍郎代劉東星管理河道議上築決口下疏故道為經久計甫兩月以勞卒贈兵

部尚書

明史藁

嚴而泰字師孔鄱陽人弱冠領鄉薦授彞陵學正薦入南雍助教能以師道自重服士心陞潁州守治行著聞卒於官結髮束修迄於彊仕粹然一節鄉評重之

人物志

王守勝字以敬德興人從錢緒山遊聞陽明先生之學萬曆已卯領賢書時年六十一授貴池教諭隨轉紹興教授俱以古道訓士擢揚州倅署通州篆政稱廉平

安志

吳榕字子充安仁人萬曆癸酉鄉薦初授宿寧學博以成就人才為已任有王九叙者以童年應役榕從傭中特識之為請於令得免役且飲食教誨之後成進士為名柱史秩滿遷貴池令改調房山邑近畿輔多貴戚中宦侵奪民產為患者數十年有御史某者檄民據實陳訴許以疏聞而惡璫煽先發之毒反噬取旨逮富民李當賢數輩誣其侵影皇莊緹騎暴悍且侵辱長吏榕忿激為民請命由是忤中貴遂以病免

同上

蔡毅中字弘甫萬年人萬曆進士由翰林院侍讀進講經筵

善於輔導克成儲德歷國子監祭酒纂修國史方魏璫勢熾獨抗疏彈劾罷歸卒諡文莊

府志

陳大綬字長卿浮梁人萬曆進士授涇縣令止璫開礦邑賴以寧陞工部主事調兵部職方司郎中出督學兩浙晉備兵常鎮尋移閩海遂告養歸里依依子舍者十餘載特起尚寶卿轉太僕卿

人物志

方應庚字長卿樂平人萬曆進士授河南鞏縣令值歲饑民鬻男女自活每捐俸贖之調廬州合肥汰冗平差修學校築圩塘邑有厲疫請以身代飛蝗不入境入覲授禮部主客清吏司主事以母病告養歸

同上

黃龍光字二為浮梁人萬曆進士授水部郎督兩宮大工以節省忤中官時六科廊燬奸璫中傷謫黔及召還家居二

十餘年淹貫經史及當代典故天啓元年起復兵部武選司轉尚寶陞太僕正卿皆著成績歷右通政司建言停刑以培國祚拂璫意羅織遣戍偏沅飄然就道璫敗詔復原官

同上

按龍光所著有黔遊草二卷

胡舜胤字明祚餘干人萬曆進士質美好學名節自勵為本邑鑄鐵斛胥役不得意為增減初任桐鄉有政績歷任大理寺評事刑禮二部郎中轉福建僉事

同上

按胡舜胤所著有春秋解崇雅堂集

陳之可字汝時鄱陽人父志昂事親以孝聞之可童年母卒哀毀成羸疾初婚痛不及母命不忍成婚即室內為母位哭奠夜深跪哭不起遂昏眩卧地至曉後父歿不御酒肉

不入內室者三年竟以羸疾卒邑里重之 同上

史書昌字二昌鄱陽人資性穎異幼即以古人自期見人所為制義歎曰四子之書皆求仁之學吾儒性命之要也寧區區咕嗶以干祿仕乎遂閉戶窮經性至孝年十四諸昆析居書昌獨承顏膝下頤志愉愉孺慕終身為常曰貧者士之常減一分嗜欲便增一分天理其平生究理明信道篤大率如此 同上

洪世弼字汝賢樂平人萬曆己卯鄉薦知萬泉縣縣苦劇盜立擒獲以除害民病水窪建堤橋以興利陞禹州知州時黃河淤塞下州縣濬治躬率河夫一千刻期告成部使者上其事於朝調任蘄州卒 安志

李日修字初吉浮梁人萬曆己酉鄉薦歷官工部主政督熹

宗山陵節省浮濫貂璫不敢少私陞叙州知府釐奸剔弊執法不回擢雲南臬副攬轡行部風紀肅然 安志

閔址字蠡襟鄱陽人萬曆歲貢任興化訓導遷南平令憂歸服闋補沐陽縣抵任值運河淤塞上發帑金八十萬遣重臣督理專責印官疏之址相度經營勞傷致疾閱歲河工告成擢高郵知州命甫下而卒 同上

舒邦儒字真卿餘干人萬曆進士少以德行重於鄉事繼母以孝聞後因艱子嗣買妾得淮揚孫氏女臨去母不忍別邦儒太息曰吾求男而使人以女病乎遂厚贈金而遣之初任徽州司李刑獄平允大司徒殷欵人也欵土故籍絲稅會下清丈之令殷止均五邑時構爭力甚邦儒正色裁之事得息陞南刑部主事持法如初 同上

胡繼美字中在鄱陽人萬曆進士初任東莞令廉潔自持邑有牛稅魚稅民間苦之繼美裁他稅以抵二稅積困遂甦補閩之漳浦擢驗封主事歷考功稽勲文選三司郎中出典河南鄉試當時柄璫戚畹聲勢張甚卒能履險而不罹於咎人服其智後乞假歸省踰年起大理左丞同上朱一桂字廷萼浮梁人萬曆進士授婺源知縣行取兵科給事中轉湖廣江防叅議積官刑部右侍郎南都察院右都御史冠帶閒住崇禎初詔復原官未任隨卒賜祭葬府志程再伊字連叔鄱陽人萬曆進士授浙江蕭山令邑有北海塘腴田萬頃每為潮汐所漂沒再伊相度形勢募民築堤越歲告成遂享灌溉之利秩滿晉儀曹郎出補漳南監司未幾告歸人物志

陳嘉訓字彛仲鄱陽人萬曆進士初授行人出為南吏科裁正上供錢糧聿清耗蠹中貴人憚之時青宮遷延未定屢疏請立光宗及論罷閩越兩巡撫與有司之不肖者先是科員命下例當面閣時相溫顏留與語嘉訓不為動辭出至南中不踰年竟論罷之嘉訓亦以是謫歸人物志

廉靖字安卿鄱陽人萬曆舉人知肥鄉縣蒞任三載遂乞致仕邑有劉生去非者初以誣陷獄靖察其寃得釋劉尋登第代巡西江臨饒造廬奉三百金為壽力辭弗獲曰此德金也因置義田以供祭祀及資子弟之讀書而貧者嘗一夕坐館中見火光燭地呼主人至掘地得金主人請分之靖曰我寒士弗敢當汝悉持去靖即以是年舉於鄉後令肥歸檢其俸適與前金數符居林下講學不輟卒年九十

西江志 卷九十一
祀於鄉 同上

江和字不流鄱陽人萬曆丁未魁南宮初任刑曹郎欽恤關
陝多所平反且以江右官徵官解法易秦民累適甘肅告
警指授方畧賴以無虞有二帥以千金餽俱却之出守成
都註上考擢滇南學政東粵糧儲晉福建按察使得馳封
三世喜曰吾遂初矣遂致仕歸及璫禍作獨得翱翔寥廓
其知微如此 安志

許大忠字元甫鄱陽人生而清癯博覽羣書為諸生有聲後
遂厭習舉子業遍訪名賢務求正學平生積貲五十金盡
出以付司會者為景仁堂講學費太守張靜涵與為布衣
交每微行造訪而元甫雖公事亦未嘗一詣公庭 人物志
閔翼明字襄甫鄱陽人邑庠生天性孝友父母早歿結廬墓

側獨居十年餘生平潛心理學與同邑江不流許元甫講
學寒暑不輟 府志

張國鑰字啓之浮梁人家徒四壁萬曆甲午舉於鄉聞捷時
即往墓拜哭痛父之不及見也事母色養備至以孝聞選
就教職青檀首蓓處之裕如惟以忠孝大義勉勗諸生轉
北雍學錄陞監丞 同上

強尚質字繩一鄱陽人天性孝友愛弟撫侄曲盡恩禮為人
寬和莊重又負敏才作古今文詞援筆立就兼善書畫晚
以明經司訓建昌之新城師道卓然多士愛而化之 同上
紀杭字勝卿鄱陽人生有異質聞祝無功輩講學徒步從之
遊凡六易寒暑不輟萬曆辛卯中乙榜就廷試初訓鍾陵
繼諭光化所至以興學作人為已任擢知普安遂乞歸 安

志

湯廷耀餘千人萬曆中從劉綎征蜀積功至都督僉事子應瑞少隨父行間每力戰先登崇禎初流氛日熾奉調隨征父子血戰陷陣而死

人物志

史稽古字心堯鄱陽人萬曆間選貢授華亭丞陞陽山令陽山故昌黎之桐鄉也齋有兩松相傳韓公手植稽古至為之剪荒理穢每政餘即吟詠其下或操筆為文不作猶人語著有僅存等集

同上

劉三策字叔簡鄱陽人與兄三省孝友最篤天啓辛酉同登賢書念母老求祿養授棗陽學博內艱服闋補廣西旋擢仁壽縣舊無城且乏兵守羣賊蜂起犯川三策日練士卒扼險要為固守計未幾賊勢益張度不能支遂令子居州

懷印從間道詣府上之詰朝賊大至率眾巷戰自已至午援兵竟絕出獄囚助之力盡被執罵不絕口賊怒支解之

安志

江南錦字列明鄱陽人天啓丁卯鄉薦主試倪元璐獨賞其奇以足疾不能上春官絕意進取專肆力於古文辭著書多散逸梓以行者猗嶠書屋文集而已

人物志

葉應震字長東餘千人崇禎進士時楚氛孔亟起復楊嗣昌為大司馬應震上章擊之不報授都水司主事治河著績癸未陞四川副使未任會父歿哀毀骨立事母孝養備至母歿茹蔬廬墓不復與人世間事食貧二十年著有易鑑合叅五經纂註四書貫等集

安志

詹時雨字霖臣鄱陽人崇禎進士給事中書科時上發策問

兵餉條對稱旨擢監察御史出巡福建以嚴直忤權要遷
蘇松道隨督學貴州一秉虛公黔中得人於斯為盛同上

李思謨字承伯浮梁人崇禎進士令深陽留意教養時權相
奏令各省童子分等第納銀免府縣考試諸路風靡思謨
獨不奉行乙酉罷歸隱居鄉里卒於家府志

鮑文弘字士可浮梁人崇禎進士任惠州司理活疑獄甚衆
時土寇竊發設計討平之居鄉敦尚儒雅誘進後學凡邑
利弊悉力言於當事人皆德之安志

董尚行字篤卿德興人博通經史尤究心理學從明德先生
遊悟性命之旨因有獨得諄諄以誘進後學為已任因著
紀言編一卷既歿郡守張有譽請祀鄉賢同上

史乘古字爾力鄱陽人崇禎庚辰授寧津令承荒敝之餘推

意休養民懷其惠又保守孤城以治行報最擢永平治中
未任歸同上

高日臨字儼若鄱陽人崇禎壬申以恩選知四川大寧縣寧
多高山深箐人跡罕到忽山後有賊自鹽井來倉猝間乏
戰守備時夔護篆者方阻兵自衛日臨齧指血上書求援
不報城遂陷不屈死之同上

徐明揚字宗允浮梁人以選貢授山西平順知縣平順因山
為城地僻民貧明揚抵任勸農課士緩征息訟民咸戴之
崇禎六年流寇至議者曰蕞爾孤城無與為守曷若權宜
避郡可乎明揚曰吾為朝廷守土設不虞惟有死耳因設
法守禦賊不能克後力竭城破不屈以死同上

胡重明字養元鄱陽人崇禎末以歲薦授贛州訓導後署安

遠縣事土司兵變逼城重明奮不顧身督卒固守及城陷

同上

朱衣坐堂上不為動寇刃之并刃其家屬七人

羅伏龍字佐才餘干人崇禎庚午舉人福王時參史可法幕

代周志畏為江都知縣

大兵圍揚州可法謂伏龍亟去伏龍曰大丈夫豈可臨難苟

免城破死之

明史藁

國朝

范文程字現斗祖貫樂平人九世祖景申戍遼左六世生總

字平甫明正德進士累官巡撫寧夏晉兵部尚書總生澄

澄生楠楠生文程幼補博士弟子員以文武全才從

太

祖皇帝龍飛叅贊機務克著元勳順治甲申

國家定鼎燕京以翊戴功晉內祕書院大學士掌院事年未

六旬即上章歸政退居林下構園亭於郊外日讀書其中

賦詩彈碁以自娛在政府掌機務十有七載勲名壽考善

始全終尤為世所罕及子承謨順治壬辰進士歷官浙閩

總督耿精忠反抗節不降而死諡忠貞

人物志

史彪古字煥章鄱陽人順治壬辰進士入翰林改給事中前

後居諫垣十年性狷直後擢京卿歸里卒著有梧垣奏議

善惡明微等書

安志

王好善萬年人性孝友家居耕讀樂施與順治甲午大旱歲

飢倒廩出粟賑貧隣有賣妻鬻子者力為收贖屢與鄉飲

年八十三歲一門四代人以為善行之報云

府志

楊鼎臣樂平人父明由為盜所執索多金贖命罄家不能得

鼎臣毅然以身易父還竟為盜殺邑令扁旌之

安志

黃有章字闇如鄱陽人順治己丑歲貢性耿介渾樸與物無競幼女曾受蕭氏聘蕭氏子被掠杳無音問有章誓不悔盟後二十年蕭氏子歸伊父母俱亡家無立錫有章撫養如己子甲寅避兵儒塘一日沐浴逝年八十有七府志

王閱道字趙如鄱陽人家貧九歲猶未就傅有志向學以伯氏爲師天資明敏弱冠食餼于庠以歲貢赴廷試念親老亟歸侍養父疾危篤呼天請以身代已而果瘳事兄撫弟備極友愛子傳康熙辛未進士翰林院檢討馳封如其官閱道不改素履著書談道優游泉石以終老人稱海岸先生

崇祀錄

洪國屏號耕石餘干人以歲薦任訓導教諭歷十二年陞中部知縣有惠政尋以老病乞休卒于邸清儉至無以殯所

著有尚書會旨幻真編諸書府志

彭允升安仁人邑庠生康熙乙卯賊踞邑城允升團結鄉勇禦賊被執勒招降所聚鄉勇不從遂遇害鄉人義之爲塑像祀本里白兔寺同上

吳鎬字西澗安仁人幼喪父與叔同居事之猶父叔二子鎬尤友愛之後叔子固求分析鎬不得已取貲產三分之一餘悉以歸叔子族黨高其義讓尤工詩文刻有西澗集同上

沙坤瑞餘干人性至孝十六歲喪父衣棺無資典身殯殮種蔬供母母目喪明每以舌洗其障膜母年八十餘衰病不能起朝夕奉侍始終無怠及母終汲水以浴母不忍輕棄其水一飲而盡隣里感其孝憐其貧稍捐以葬廬墓三年

致馴虎伏蟒之異 縣志

胡之珩字集英餘干人居仁八世孫築室藏山之麓顏其堂曰希敬平生學問尤精于易兼通河洛理數晚充歲貢聘主東山書院教所著有希敬堂八箴東山學規及詩經養正藏於家 府冊

西江志卷第九十

西江志卷第九十一

人物 二十六

南康府

南北朝

周續之字道祖雁門人其先過江居建昌八歲喪母哀戚過于成人奉兄如事父晉太守范甯立學集徒續之年十二詣甯受業數年通五經五緯號曰十經名冠同門稱為顏子既而閒居讀易老入廬山事沙門慧遠時彭城劉遺民遁跡廬山陶淵明亦不應徵命謂之潯陽三隱嘗以嵇康高士傳得出處之美因為之注武帝遣使迎之禮賜甚厚每曰真高士也通毛詩六義及禮論注公羊傳 南史

按傳續之居豫章建昌今建昌為縣屬南康府人物志

訛入南昌又重入九江今據史改定他如陶侃已入饒州陶淵明已入九江人物志復載南康今概行刪去

司馬暉建昌人仕陳為大中大夫性至孝母病亟禱于先祠願以身代母果得痊 明一統志

司馬延義字希忠建昌人為陳司徒從事中郎事親孝居喪哀毀朔望詣墓哭奠路旁老柏遂為枯瘁 林志

凌恭字遵德建昌人精通五經埋名晦跡煬帝時召為學士同上

唐

張懷約字進宏建昌人初仕隋歸唐為温州司馬博學強記文詞典麗講三禮三傳出諸儒之右性尚簡約後隱于當

陽山莫知所終 明一統志

郭元靖字長寧建昌人才兼文武隋末興兵保衛鄉里後歸唐累官虔撫吉三州司馬衡州刺史所在以廉謹稱 豫章書

書

徐元之建昌人幼穎悟通經史年十七第進士累遷監察御史諫議大夫出為湖州刺史遷邠王府長史改曹州刺史

有文集十卷 林志

宋

劉彥誠字彬國都昌人散騎常侍光祿大夫以開國元勳賜諡武忠子仲武英宗時錫太師封吳越國公諡威肅仲武子錡字信叔仕至開府儀同三司自秦州奉母還葬都昌

卒贈少傅諡武穆 人物志

按宋史劉彥誠無傳可攷劉仲武傳云秦州成紀人不

西江志 卷九十一
云彥誠子劉錡傳云德順軍人仲武第九子亦無奉母
還葬都昌之文林志一統志豫章書俱不載不知人物
志何所據而以為都昌人今援史傳駁正附識于後

洪文撫南康建昌人本姓殷犯宣祖偏諱改焉曾祖諤唐虔
州司倉叅軍子孫衆多以孝悌著稱六世義居室無異爨
就所居雷湖北創書舍招來學者至道中本軍以聞遣內
侍裴愈賫御書百軸賜其家文撫遣弟文舉詣闕貢土物
為謝太宗飛白一軸曰義居人以賜之命文舉為江州助
教又詔表其門閭自是每歲遣子弟入貢必厚賜荅之文
撫兄子待用登咸平進士第至都官員外郎 宋史

江白建昌人景德進士父禹錫有節義高年不仕躬自教授
祥符初獻東封詩十五篇有詔嘉美賜以粟帛歲時遣使

存問五年卒白自鄞尉罷還負土營葬廬於墓側藜羹芒
屨晝夜號泣將終制猶然轉運使以其狀聞詔賜帛十二
疋粟麥二十石醪酒十缸 同上

孫琛冕之子冕請白鹿洞故址為歸老之地詔從之未歸而
卒琛克承先志即其址家焉皇祐中以家資置學館十間
扁曰白鹿書堂以教子弟四方願就學者廩之郭祥正為
記仕至禮部郎中 林志

按郭功父青山集中無白鹿書堂記

陶唐字元堅星子人潛之裔通六經精子史尤長於春秋發
明奧旨後學名士多出其門 同上

李亮采建昌人臨川鄒餘吳履中相繼為鄂州通城知縣于
學宮建資源堂以書幣聘海昏李亮采典教事力學以待

舉修己以致人士皆樂就之

黃山谷集

按李亮采志書皆不載今采山谷所撰資源堂記補入李常字公擇南康軍建昌人也舉進士調江州判官宣州觀察推官發運使楊佐薦改秩常推其友劉琦佐曰不見此風久矣并薦之議者謂常能舉善而謂佐爲知人除祕閣校理熙寧初自太常博士改右正言時方更法常言始建三司條例司已致天下之議至於均輸青苗歛散取息傳會經義人且大駭又言州縣有不散常平錢而但使民出息者詔常具姓名以聞常不以聞遂落校理通判滑州歲餘復職知鄂湖齊三州召爲太常少卿遷禮部侍郎哲宗立進吏部侍郎常上七事曰崇廉耻存鄉舉別守宰廢貪賍謹疑獄擇儒師修役法又論役法差免二科以爲法無

新陳便民爲是今使民俱出資則貧者難辦俱出力則富者難堪盍各從其願庶幾可久加龍圖閣直學士論取士請分詩賦經義爲兩科以盡所長改兵部尚書辭不拜出知鄧州徙成都府而卒年六十四有文集奏議六十卷詩傳十卷元祐會計錄三十卷常少讀書於廬山五老峯白石菴之僧舍書幾萬卷旣貴思欲遺後之學者乃藏於山中時人目其居曰李氏藏書山房而蘇軾爲記其事云

東都事略

崔閑字誠老星子人讀書不務進取襟懷清曠以琴自娛結廬于玉潤號睡足菴自謂玉澗道人東坡過之曰醉翁喜瑯琊山水沈遵以琴寫其聲惜乎無辭今玉澗道人妙于琴故因其聲而爲辭以補石刻在郡齋

林志

陳圓字德方星子人飽學獨行嘗應制科尋隱後山名輩多出其門黃魯直訪之賦詩有域中咫尺雲橫棧獨倚前山望後山之句又名其堂曰獨善林志

陳慕

一作篆

字必正星子人宣和進士少從陳瑩中劉壯輿蘇

養直遊廉靜有守歷任州縣所至有政聲及佐大藩或勸求郡不肯屈節歷倅洪潭明三郡以祖業遜兄初預寄居後山號星灣先生子準字正臣以父蔭補官年五十即挂冠歸林志

李公懋字子勉建昌人建炎進士累官江西提舉召對陳五事擢監察御史高宗駐蹕建康大臣請還臨安公懋力排秦檜以為不可疏三上不報出為湖北提刑累遷太府少卿終湖南漕林志

曹興宗字伯起都昌人紹興進士仕至叅軍贈光祿大夫所至政聲籍甚子三人長彥純次彥約俱受業朱子之門彥約自有傳人物志

雷濂字朝宗建昌人胡銓一見大嘉賞張栻尤推重之同上

蕭之敏字敏中都昌人登進士授監察御史累官吏部侍郎出為湖南轉運副使終祕閣修撰周必大銘其墓林志

戴師愈號玉谿子星子人博學強記撫廬山古今人物著列傳十三卷又作麻衣易後登隆興進士授湘陰簿同上

曹彥約字簡甫都昌人淳熙進士嘗從朱子講學薛叔似宣撫京湖辟主管機宜文字漢陽闕守檄攝軍事時金人大入郡兵素寡弱彥約搜訪土豪得許禹俾總民兵趙觀俾防水道党仲昇將宣撫司軍屯郡城金重兵圍安陸遊騎

闖漢川彥約授觀方略結漁戶拒守南河觀逆擊斬其先鋒且遣死士焚其戰艦金人大敗去又遣仲昇劫金人砦殺千餘人以守禦功進秩二等就知漢陽尋提舉湖北常平遷湖南轉運判官時盜羅世傳李元礪等相繼竊發桂陽茶陵安仁三縣皆破彥約至彼督運人心始定遷知潭州湖南安撫世傳素與元礪有隙至是密請圖元礪以自效彥約錄賞格報世傳遂禽元礪彥約還長沙未幾復出督戰餘黨悉平擢右侍郎官出為利路轉運判官兼知利州關外乏食彥約悉發本司所儲減價遣糶勸分免役通商蠲稅民賴以濟差知寧國府又改知隆興府江西安撫遷大理少卿以寶謨閣待制知成都理宗即位擢兵部侍郎入對勸帝講學防近習次言當以慶曆元祐聽言為法

以紹聖崇觀諱言為戒比年以來有以賣直好名之說見於奏章者願陛下倚忠直如著龜去邪佞若蝨賊其有沮撓讜言者必加斥逐會下詔求言彥約薦隆州布衣李心傳素精史學乞官以初品寘之史館遷禮部侍郎授兵部尚書力辭不拜以華文閣學士致仕卒賜諡文簡

宋史

黃灝字商伯南康都昌人入太學擢進士第教授隆興知德化縣以興學校為本歲饉行賑有方光宗即位遷太常簿請勅有司取政和冠昏表葬儀及司馬光高閔等書參訂行之除太府寺丞提舉常州路常平秀州海鹽民伐桑柘毀廬屋葶藿盈野而州縣方督促逋欠灝見之蹙然時有旨倚閣夏稅遂奏乞併閣秋苗不俟報行之言者罪其專移居筠州已而削兩秩灝既歸里幅巾深衣騎驢匡山間

若素隱者起知信州移廣東提點刑獄告老不赴卒朱子
守南康灝執弟子禮質疑問難朱子沒黨禁方厲灝單車
往赴徘徊不忍去者久之 同上

按黃灝所著有西坡集四十卷卒謚文簡史傳失載

李燔字敬子建昌人紹熙進士授岳州教授未上往建陽從
朱子學至岳州教士以古文六藝不因時好以祖母卒解
官承重補襄陽教授復往見朱子凡諸生未達者先令訪
燔俟有所發乃從而折衷謂人曰他日任斯道者必燔也
朱子沒學禁嚴燔率同門往會葬不少怵及詔訪遺逸九
江守以燔薦辭郡守請為白鹿書院堂長學者雲集尋添
差江西幹辦公事會洞寇作亂燔請自往分兵守險馳辯
士諭賊順逆禍福寇皆帖服洪州地下異時贛江漲而隄

壞久雨輒澇燔白于漕帥修之自是田皆沃壤有旨改通
判潭州真德秀為長沙帥一府事咸咨燔不數月辭歸時
史彌遠當國自是不復出卒年七十贈直文華閣謚文定
燔入仕凡四十二年而歷官不過七考居家講道學者宗
之與黃幹並稱曰黃李 同上

馮椅字奇之都昌人受業朱子紹熙進士仕至江西運幹家
居授徒所著易詩書語孟太極圖西銘輯說孝經章句喪
禮小學孔門弟子傳讀史記及詩文志錄合二百餘卷配
饗於學子四人去非仕至諫議大夫去辨仕至侍郎去弱
知寧國府去疾直徽猷閣 人物志

彭尋字師繹都昌人淮寧府學教授南圖之孫有文行鄉里
稱曰東園先生嘉定間特奏名 林志

彭蠡字師范尋之弟文公守南康時門人質疑義辯析甚精
為文公所重號梅坡先生築室訓徒授業江淮之上官至
吏部尚書贈龍圖閣學士 人物志

彭方字季正都昌人朱子守南康方就學于其門弱冠魁省
闈累官至祭酒兼侍講執法至殿中遷兵部侍郎請歸加
龍圖閣學士諡文定 同上

馮去非字可遷椅子淳祐進士為宗學諭丁大全為左諫議
大夫三學諸生叩闥言不可下詔禁戒詔立石三學去非
不肯書名碑下未幾以言罷歸舟泊金蕉山有僧上謁致
大全意願無遽歸少俟收名乃奮然正色曰老夫今歸廬
山不復仕矣絕之不與言 明一統志

鄧輪字伯衡建昌人理宗朝甫七歲舉神童科十七登第授

黃梅主簿陞江西運幹所在有政聲弟輿字伯載亦八歲
由神童科理宗朝登第授和州司戶 人物志

熊兆字世卿安義人受業于朱子學得其傳隱居弗耀自號
拙逸子文公為著拙逸子說以遺之 林志

按朱子全集無拙逸子說其裔孫孝廉名秉鐸錄以見
示附載于後云熊君世卿乞書拙逸二字余曰作德心
逸日休作偽心勞日拙毋乃與子之言異乎君笑曰彼
巧者勞智者憂吾惟拙故逸云爾拙非繆悠之謂也物
之自然性之天也蔽吾天汨吾自然窮年竟歲方寸擾
擾隨富且貴求吾一日之逸有終身不可得者矣余曰
噫逃世網而解天刑非君其誰哉

陳柎字咸和慕之子任江夏令築堤捍水民德之調善化佐

淮東總幕築楚州城終池州倅同上

陳秬字秀成秬之弟力學忘倦交遊必擇三試禮部不第遂

棄科舉師事文公義理益精同上

胡泳字伯量建昌人嘗從朱子游不樂仕進學者翕然尊之

稱爲洞源先生從祀白鹿洞三賢祠同上

周謨字舜弼余宗傑字伯秀李輝字晦叔劉賁字炳文俱建

昌人四人同學于朱子之門並有時名不求仕進同上

呂炎字德明建昌人與弟呂燾呂煥同遊朱子之門學成而

歸隱居弗仕道德聞望爲時所重人物志

周耜字植叟星子人性沉靜博雅好古有詩名常侍父官襄

陽帥臣張杓一見奇之待以殊禮晚集文公語錄以詔後

學江東繡使禮聘爲白鹿洞主其講學至老不倦云人物

志

江萬里字子遠都昌人少神雋有鋒穎連舉於鄉入太學有

文聲理宗在潛邸嘗書其姓名几研間以舍選出身歷池

州教授沿江制置司兩浙安撫司幹辦公事召試館職遷

著作佐郎兼樞密院檢詳文字知吉州創白鷺洲書院召

爲屯田郎官未行遷直祕閣江西轉運判官權知隆興府

創宗濂書院久之以駕部郎官召遷尚右兼侍講史嵩之

罷相拜監察御史遷殿中侍御史萬里器望清峻論議風

采傾動一時帝眷注尤厚嘗乞祠省母疾不許屬弟萬頃

奉母歸南康旋以母病聞萬里不俟報馳歸至祁門得訃

而議者謂萬里母死祕不奔喪反挾妾媵自隨於是側目

萬里者相與騰謗萬里無以自解坐是閒廢者十有二年

後陸德輿嘗辨其非辜於帝前賈似道為京湖宣撫大使以萬里帶行寶章閣待制為叅謀官元兵圍鄂似道以右丞兼樞密使移軍漢陽萬里遷刑部侍郎似道入相萬里兼國子祭酒侍讀入對遷權吏部尚書同簽書樞密院事隨以言者去官後以原職權福建轉運使度宗即位召遷叅知政事萬里始雖為似道用然性峭直臨事不能無言故每入不能久在位帝在講筵每問經史疑義及古人姓名似道不能對萬里常從旁代對似道怒謀逐之萬里四乞祠不候報出關後二年知太平州兼江東轉運使召拜叅知政事進封南康郡公既至拜左丞相乞祠加觀文殿大學士提舉洞霄宮尋予祠時年七十有六矣明年元兵渡江萬里隱草野間為遊騎所執大詬欲自戕既而脫歸

先是萬里聞襄樊失守鑿池芝山後圃扁其亭曰止水人莫諭其意及聞警執門人陳偉器手曰大勢不可支余雖不在位當與國為存亡及饒州城破竟赴止水死左右及子鎬相繼投沼中積尸如壘事聞贈太傅益國公加贈太師謚文忠

宋史

江萬頃字子玉號古崖萬里弟歷守大郡所至以循廉稱知南劍州內寬外明政教備舉以興學為第一義嘗增置學田以助廩餼家居元兵至境委置私第冒險難自都昌赴饒州兄所偕子鐸俱被執罵賊而死

人物志

陳大猷字文獻都昌人師雙峯饒氏歷仕至從政郎改黃州

軍判官著尚書集傳

人物志

李成大建昌人登進士德祐初知金壇郡元兵至與戰不勝

吏民脅成大降乃潛與胡用存謀復金壇事泄繫獄榜掠
不屈遂殺其二子以懼之終不屈笑曰子為父死臣為君
死卒殺之詔贈直祕閣謚忠節

同上

陳畦字子從秬之子仕襄陽南漳尉調靖州判官魏了翁薦
之不就以通直郎致仕人壯其勇決祖孫相望皆盛年納
祿云

人物志

王時潛字源魯都昌人隱居不仕累辟皆辭附註禮記士類
宗之

同上

陳師愷字叔才都昌人專究理學纂述書經蔡傳旁通行於
世

同上

陳澔字可久大猷子生宋季不求聞達博學好古有禮記集
註行於世學者稱為經歸先生年八十有二卒元奎章學

士虞集題其墓

同上

元

高必達建昌人五歲時父棄家遠遊莫知所適必達既長晝
夜哀慕乃娶妻以養母而歷往四方求其父十餘年不得
忽傳黃州全真道院中有虛明子者學道三十年矣本姓
高氏建昌人也匿姓名為道人云必達詢問知為父即往
拜之具言家世及已之所生歲月大父母之喪葬始末因
哀號叩頭不已虛明猶瞑坐不顧久之斥曰我非汝父不
去何為必達留侍左右不少懈辭氣哀惻可矜其徒謂虛
明曰師有子如此忍弗歸乎虛明不得已乃還家必達孝
養篤至鄉里稱之

元史

按高必達林志訛載建昌府今據史傳改正

葉清叟字澄心星子人博學工詩為隆興路儒學錄復調南康嘗入廬山采藥遇異人授以奇方遂精于醫子宗仁隱居教授學窮經史授白鹿書院山長遠近宗之 林志

謝珪字西蟾建昌人宋丞相謝方叔四世孫至正間以故官子孫授建寧路擢鹽茶提舉克稱厥職 林志

燕公楠字國材南康之建昌人宋禮部侍郎肅之七世孫母雷氏夢五色巨翼入幃遂生公楠十歲能屬文再貢于鄉不第後以連帥辟五遷至通判贛州事世祖既平江南帥臣板授同知贛州事以平廣南功遷同知吉州路總管府事召至上都奏對稱旨賜名賽因囊加帶命叅大政辭乞補外除僉江浙行中書省事俄移江淮尚書省就僉江淮行尚書省事江淮在宋為邊陲故多閒田公楠請置兩淮

屯田勸導有方田日以墾除大司農領八道勸農營田司拜江淮行中書省叅知政事桑哥既敗而蠹政未盡去公楠赴闕極陳其故請更張以固國本會欲易政府大臣以問公楠公楠薦伯顏不灰等十人又問孰可以為首相對曰天下人望所屬莫若安童問其次曰完澤可明日拜完澤為丞相以公楠及不灰為平章政事固辭改江浙行中書省叅知政事賜弓矢及衛士十人以行三十年復為大司農得藏匿公私田六萬九千八百六十二頃歲出粟十五萬一千一百斛鈔二千六百貫帛千五百疋麻絲二千七百觔進河南行省右丞入覲成宗以公楠先帝舊臣慰勞良至改拜江浙行省右丞遷湖廣行省右丞五年召還朝卒賻贈有加特命朝臣護喪南歸 元史

余仁仲星子人至正間為贛州路知事時尚書哈海叅政全
普菴撒里守贛每與仁仲圖議軍事匡贊甚多丁酉紅巾
圍安慶仁仲言於尚書叅政曰安慶圍急當移檄省憲合
兵赴援無安慶則江右不可保既謀不用安慶陷仁仲歎
曰國事去矣以疾辭官移家龍興卒葬西山府志
鄭佛生建昌人早孤母病孿貧無以為養日賣菜歸必為母
盥櫛飼飲食扶掖上下掃除便溺二十餘年始終弗怠母
卒年七十餘有司以聞詔表其門林志

黃異字民同灝之裔少好學讀書於白鹿書院至元進士為
廣東惠州學錄遷南安道源書院山長元季棄官歸隱授
徒自號節菴有節菴詩集三十卷子朋亦能世其家學同
上

明

于光字大用都昌人少磊落有大志徐壽輝畧湖口拔都昌
署光江東宣慰及友諒弒壽輝光以輕騎歸高帝于龍江
拜行樞密院判從征九江下黃梅戰鄱陽降武昌有功擢
衛指揮從徐達平淮東浙西擒張士誠取汴梁克陝洛下
潼關而佐都督郭興守之別擊破元左丞軍李思齊徙守
鞏昌擴廓帖木兒數來犯邊屢却之會擴廓偵知大將軍
達南還遂襲蘭州圍城數匝指揮張溫堅壁不與戰光帥
師援溫至馬蘭溪卒遇擴廓軍戰不勝虜執光至城下令
給溫降光大呼曰吾不幸而擄且死公等幸堅守大將軍
將大軍至矣元將怒殺光城中守益堅圍遂解上聞使使
諭祭配享功臣廟

按于光人物志明一統志所載不詳今據劉日杲所撰
列傳補入

劉誠字伯實都昌人洪武間以明經聘授河南新鄭教諭所
著有柏石集十卷

林志

余復升字文秩星子人虞文靖集每稱其文洪武初以賢良
薦授濟南章丘丞總芻粟給大軍民不勞而事集累官至

德州知州

同上

楊淞字公謹建昌人通五經洪武八年以經明行修舉國子
監助教陞祭酒

人物志

葉昭字子宣星子人通經術能文善隸古高尚氣節洪武初
聘為南康府學訓導尋以疾辭所著有樵什集子二曰堅
以孝廉薦累官刑部員外郎曰剛嘗割股以孝行稱

林志

查琛字伯玉星子人器量宏遠讀書窺見大義與士大夫講

論古今人物歷歷皆有條貫洪武中以賢良徵年老不赴

其子桴字濟海永樂進士官至禮部祠祭司郎中以孝友

著自號潭隱建有龍潭書院

南康府舊志

廖敏字悅學星子人洪武中鄉薦選入內閣修永樂大典任

刑部主事宅心公恕讞獄明允為時所稱

林志

殷革星子人由監生歷官知松江府清慎自守政聲大著母
喪服闋復知南雄時梅嶺險峻行者艱阻乃募民疏鑿通

道至今便之致仕卒于家

人物志

黃維字叔經星子人永樂間由舉人任餘姚知縣政尚簡易
務修學校民有健訟者遣入社學久之化為善士以母喪
歸民計服闋先詣闕請復知餘姚六載考績民脫履留之

未至京卒

同上

袁容建昌人父洪以軍功授左軍都督容尚永安公主成祖靖難容帥師援永平下雄縣取漢州攻真定命還守北平經營調度應機決策繕修備禦屢立大功永樂癸未錫誥券封奉天靖難推誠宣力武臣特進光祿大夫駙馬都尉廣平侯食祿一千五百石子孫世襲卒贈沂國公謚忠穆傳至成化子瑄嗣絕

府志

魏源字文淵建昌縣人永樂進士除御史辨松江知府黃子威誣奏減浙東瀕海漁課巡按陝西西安大疫奏言諸府倉粟積一千九十餘萬石足支十年今民疫妨農請輸鈔代兩稅之半從之洪熙初陞浙江副使宣德三年召署刑部右侍郎河南旱荒民多轉徙命為左布政使發倉廩免

逋賦雜役兩亦旋降歲大豐召還授刑部左侍郎奉命采木四川兼飭邊務未幾拜刑部尚書正統二年命往大同宣府督察諸將便宜從事源遣都指揮李謙守獨石楊洪副之劾指揮杜衡等抵大辟諸將肅然按行諸險要令將吏分守增修開平龍門城皆釐以甃自獨石抵宣府增置墩堠免屯軍租一年儲火器為邊備諸依權貴避役者悉括歸伍邊務修飭還朝按問遼王貴烱事不稱旨與何文淵等繫詔獄累月釋還職八年致仕尋卒

明史藁

盧翰字邦臣星子人永樂進士改翰林院庶吉士與二十八宿之選修永樂大典歷代名臣奏議改吏部主事

林志

余鼎字正安復升子永樂進士是科詔選天下文學之士二十八人以應列宿鼎與焉尋授翰林修撰博學能文與修

聖學心法及高廟實錄晉侍講尋上章乞歸鑿釣臺以自
娛所著有南坡文集行世

人物志

張鑑字惟明建昌人永樂進士巡按陝西考察文武劾舞陽
侯薛錄應城伯孫昌不法事糾冢卿郭璉後出為汝寧知

府

同上

按正德十一年始析建昌置安義人物志以鑑為安義
人者訛又鑑同邑同榜有胡新者由御史歷官按察使
見明一統志

黃珏字重美異之子少端重勵行永樂戊子舉人為星子訓
導歷安東東阿教諭典陝右文衡才名為時所重

同上

邵嵩字維嶽都昌人永樂進士任監察御史巡按遼東風采
著聞復按廣東以言事逆旨謫官因疾遂不仕自號湖山

居士有湖山集

同上

柳芳都昌人永樂進士歷官刑部郎中讞獄平恕陞湖廣叅
政尋調山西所至有政蹟時論歸之

明一統志

呂漢字朝宗星子人娶陳氏生一子早喪漢年二十餘親族
勸之再娶漢曰婦失夫理不容改節夫失婦義猶是也況
有子足繼宗嗣何再娶為年八十五而卒

林志

江福都昌人以祖壽征陳友諒有功授鎮武衛鎮撫洪熙元
年福襲祖職立功陞本衛指揮同知景泰元年生擒叛臣
喜寧陞後軍都督府都督

同上

劉衢星子人榮祖之子由鄉舉任長寧教諭性仁孝宣德間
舉家罹疾母將危求以身代一夕焚香籲天割股烹粥啖
之母病瘥鄉人以劉孝子名之

明一統志

梁崑星子人嘗罹疫癘舉家逃避弟病危衆諭使棄之出避
崑曰如崑去弟誰視湯藥竟不去人以友愛稱之後由監
生授建平訓導陞光山教諭卒於家 同上

葉瑾星子人少孤姿性英敏既長以詩領宣德乙卯鄉薦歷
儒官三十年所至訓迪有方人才輩出致仕卒於家 同上

朱讓字克遜星子人景泰間由舉人授御史遇事敢言不畏
權勢出按廣東肅振百僚尋陞大理知府多惠政以疾告
歸卒于家 同上

黃暉字有融建昌人景泰進士授工科給事累陳章疏奉使
滿刺國授一品服色官至廣西僉事綽有政聲 府志

余濂字宗因都昌人弘治進士任監察御史立朝上章有陳
愚錄巡按遼東有安邊集後謫武進知縣尋叅畫征勦蘇

松海寇有功陞蘇州府同知以母憂歸 林志

黃祺字惟德建昌人正德甲戌進士任吏部考功清查積滯
歷陞貴州按察使陞雲南布政從都御史毛伯溫征勦安
南乞歸恬退自守 人物志

徐相字文卿都昌人正德丁卯鄉薦任連州清苦自甘苗寇
逼連征勦有功陞僉事不就而歸連民舉祀名宦 府志

陶尚德字祖容星子人正德中爲諸生時會宸濠之變守令
學博棄城走尚德倡于衆曰先聖宮殿籩豆樂器在焉寧
死守濠去澤宮無恙登嘉靖進士授御史有防邊漕糧茶
稅諸疏爲左都御史協吏部考察晉少司空董築外羅城
陞刑部尚書加太子太保一品俸賜玉歸田杜門著賓廬
藁鷗波亭集穆宗御極特賜存問卒賜祭葬 人物志

周志偉安義人嘉靖進士任工部主事清理蘆課改釐夙弊
陞台州知府治河賑荒民建生祠歷四川兵備副使彞苗
服心番人塑像居家恬退所著有陽山集及台州倡和集
同上

周希貴字子良安義人賦性剛方提躬耿直初任石首教諭

陞井陘令尋陞麻哈知州抑制土官彞苗輸心管大理銀

廠稅革除萬金歷官二十餘載清介不易

府志

吳尚禮星子人嘉靖二年由監生除授歸善主簿蠻寇入境

尚禮奮不顧身督兵勦賊遂為所害

人物志

陶一貫字孔啓星子人由選貢除福建布政司理問退休因

寓白下聞倭賊潛入蘇松劫掠淮揚逼近留都自赴軍門

請師督討駐師吳江軍威大振次募兵海上遇賊於淞江

德清縣力戰而沒都御史譚綸并兩院奏聞贈奉議大夫

立廟崇祀

同上

熊儻字敬吾星子人為諸生時即棄舉子業潛心性學授徒

白鹿初與布衣章潢語未合後聞羅近溪得陽明旨要徒

步往南昌與語移時若合符契所著有易經翼旨熊子庸

言羅氏一貫編匡樵野詠等書

同上

余經元字冠卿都昌人星子貢士居親喪毀瘠過禮兄經魁

困于賦經元鬻已產以佐兄嘗登白鹿講堂為致知格物

之學有義利辨性教志氣諸解天啓間郡司理李仲達值

璫燄羅獄經元質田得若干緡為諸生倡義及卒黃石齋

表其墓

府志

余應桂字二磯都昌人萬曆進士歷知武康龍巖海澄三縣

西江志 卷九十一
徵授御史戶部尚書畢自嚴殿試讀卷取陳于泰爲第一
首輔周延儒姻也應桂劾其朋比行私已復列上延儒貪
邪傾險狀言納孫元化參貂則事皆曲徇受楊鶴重賂則
力主撫議他事干犯國法多類此帝方眷延儒厚責應桂
已而賊陷登州元化被執應桂以元化貽禍封疆皆延儒
曲庇所致復力攻之帝怒貶三秩引疾歸崇禎七年還朝
出按湖廣捐贖鍰十餘萬金募壯士繕城治器明年賊漸
逼承天應桂身護獻陵乘城守禦期滿當代命再巡一年
盧象昇撫鄖陽紬軍需應桂貽以贖鍰萬五千象昇改撫
湖廣應桂頌其忠謀請畀重權令掃蕩羣賊已而象昇赴
汝雒賊老回回等走德安黃州應桂急檄大將秦翼明拒
擊而奏報屬城失事具以實聞期滿當代復留巡撫王夢

尹罷即擢應桂右僉都御史代夢尹其冬總理熊文燦至
廣布招降之令劉國能先降明年春張獻忠亦降馬進忠
西走馬光玉賀一龍李萬慶順義王九條龍等衆十餘萬
盡萃於麻城黃安應桂分兵扼要害會光玉一龍乞降應
桂遣使往諭而遣將擊順義王等於黃福店賊遂走黃安
會文燦至麻城應桂請協擊不從賊復東走江北爲左良
玉所遏折而走廣濟蘄水惟光玉一龍觀望不動已文燦
檄諸道兵合擊賊於茶山賊於應桂所分地逸出文燦遂
劾其後期誤軍兵部尚書楊嗣昌恨應桂曾劾其父奏逮
之應桂陳撫勦始末白已無罪而力詆文燦不納逮至下
獄初應桂慮獻忠反覆貽書文燦言獻忠惡已有端可先
未發圖之其書爲獻忠邏者所得獻忠牒鄖陽巡撫戴東

旻言撫軍欲殺我語甚悖東旻聞之文燦文燦遂再糾應桂以私書貽誤封疆帝怒下法司并按應桂疏辨且言獻忠布賊孔道邀劫公移總理噤不敢問奈何反據賊口誣臣帝亦不納應桂竟遣戍已而獻忠反文燦伏誅東旻亦瘐死獄中廷臣交章薦應桂督師孫傳庭戰沒命應桂兼右僉都御史往代之應桂以無兵無餉入見帝而泣帝但遣京軍千人護行給御用銀萬兩銀花四百銀牌二百爲軍前賞功之用而已應桂將至山西賊已入其境逡巡不敢進帝責以逗遛奪職命新擢陝西巡撫李化熙代之化熙亦不能進也未幾京師陷應桂遂家居不出久之死于

難

明史藁

徐大相字覺斯安義人萬曆進士授東昌推官稍遷國子博

士百僚將早朝中官盧受傳免衆趨出受從後姍侮大相歸草二疏一論遼左事一論受奸邪時接疏者即受也見遼事疏曰此小臣亦敢言事及帝閱第二疏顧受曰此即論汝罪者受錯愕叩頭流血請罪曰奴當死疏乃留中明年遷兵部主事調稽勲移考功進驗封員外郎進士薛邦瑞爲其祖蕙請謚大相與尚書張問達議如其請熹宗方惡卹典冗濫鑄大相三秩出之外大學士葉向高都御史趙南星等連疏救乃改鑄二秩大相方候命羣奄黨受者數十輩持梃譟於門曰若猶戀此署耶搜大相橐止俸金七十兩乃闕然散崇禎元年起故官歷考功文選奏陳遵明旨疏淹滯破請託肅官評正選規重掌篆崇禮讓勵氣節抑僥倖覈吏弊十事帝即命飭行故尚書孫丕揚等二

十六人爲魏忠賢削奪大相請復其官不許旋以起廢忤旨貶秩父憂歸卒于家同上

熊德陽號清嶼建昌人萬曆進士授高明縣考選刑科給事中天啓初差祭北鎮調外崇禎己巳起兵科給事庚午副

黃道周典試浙江

安志

徐孔徒字服子都昌人萬曆舉人授四川邛州牧在任七載賢聲特著乙酉張獻忠陷城抗節死焉人物志

但宗臯號陶村星子人天啓辛酉鄉薦任開化令歸休杜門

著述有廬山詩文二紀湖南講書太極圖說驢背語府志

熊士愷字仲高德陽次子事親能養志天啓鄉薦人稱真孝廉焉有舟子失金誣其僕不辨輒倍數償之會館同舍有爭席者質于士愷立推已席委之同舍生慙更相讓其克

已類如此同上

淦君鼎號四極建昌人崇禎歲貢選贛州府學司訓丙戌吉州陷君鼎與諸生守贛謂其長子弘斌曰我與城亡丘壠可念勿以吾爲憂城陷不屈死先是次子弘祐傷箭不起是日三子弘祉於解中以詈罵被殺妻熊氏弘祐婦熊弘祉婦李孫關生秀貞婢呂氏端香輩並赴井死惟弘斌脫歸備識一門貞烈狀云人物志

國朝

熊維典號約生建昌人明崇禎間兵科給事順治十四年巡

撫蔡士英按察李長春禮請主鹿洞書院教

白鹿洞志

宋之盛字未有星子人明崇禎己卯以春秋薦赴禮部試不第遭國變不入城市以講學爲己任其學以明道爲宗以

識仁爲要於二氏微言與旨隨手箋訂抉摘異同非如世
之闢異論者舍精而攻其拘也與盱江謝文洊爲最契晚
讀胡敬齋居業錄持敬工夫益密少孤事兩兄如父戊申
五月以疾卒同邑有查小蘇者亦棄諸生隱居不出年九
十而終

陳其誠字獻赤安義人明崇禎間以選貢任行唐令剛介不
避勲貴吏民畏愛致仕歸林課農訓子順治丙戌間有司
敦請鄉飲大賓

縣志

徐碭字三連安義人順治辛卯舉人任湖廣益陽知縣奉檄
招撫叛逆吳三桂被害贈僉事子祭葬蔭一子入監

安志

王廷憲字斌爲安義人博學俊爽明崇禎壬午鄉薦康熙丙
午宰歙縣聞父喪瀝血辭職以新例奪情哀毀骨立累章
陳情終制乃得請抵家撫柩慟哭吐血數斗逾年遂卒著
有葛廬集家訓詩文行世

同上

干特字達士星子人南豐湯來賀主鹿洞極獎其文行爲及
門冠閩撫張伯行聞其賢聘往鰲峯書院以衰老未就自
爲諸生歷試冠軍僅以貢終以子建邦貴封文林郎著有
志道編

湯永寬隨過堂集

干建邦字淑掌特子康熙庚辰進士宰舞陽時值大澇甫下
車惻然不待詳允即先發貯粟民賴以活復舞泉書院置
田聚書豫有蝗獨不入舞陽境上官異之以外艱去民懷
德立祠先是需次家居當事聘主鹿洞父子繼居講席著
有鹿洞續言及湖山堂集

同上

西江志卷第九十一

西江志卷第九十二

人物二十七

九江府

晉

翟湯字道深尋陽人篤行純素仁讓廉潔不屑世事耕而後食人有餽贈雖釜庾一無所受永嘉末寇害相繼聞湯名德皆不敢犯司徒王導辟不就隱於縣界南山始安太守干寶與湯通家遣船餉之勅吏云翟公廉讓卿致書訖便委船還湯無人反致乃貨易絹物因寄還寶寶益歉愧焉咸康中征西大將軍庾亮上疏薦之徵為國子博士湯不起建元初庾翼北征石季龍大發僮客以充戎役勅有司特蠲湯所調湯悉推僕使委之鄉吏吏奉旨不受湯依所

調限放免其僕使令編戶為百姓康帝復以散騎常侍徵固辭老疾不至年七十三卒於家

晉書

翟莊字祖休以孝友著名遵父湯之操不交人物語不及俗惟以弋釣為事及長不復獵或問曰獵漁是害生之事先生止去其一何哉莊曰獵自我釣自物未能頓盡故先節其甚者時人以為知言晚節亦不復釣端居葦門歛菽飲水州府禮命及公車徵並不就子矯亦有高操屢辭辟命矯子法賜孝武帝以散騎郎徵亦不至世有隱德云

同上

周訪字士達本汝南人漢末避地江南至訪四世吳平因家尋陽訪少沉毅果於斷割為縣功曹時陶侃為散吏相與結友察孝廉除郎中上甲令皆不之官元帝渡江命參鎮東軍事尋以為揚烈將軍領兵屯尋陽鄂陵與甘卓趙誘

討華軼軼將周廣燒城以應軼眾潰執而斬之遂平江州以訪為尋陽太守復命與諸軍共征杜弼弼遣其將張彥陷豫章王敦時鎮湓口遣李恒受訪節度與彥交戰訪率帳下將李午等臨陣斬彥賊遂退歸湘州訪復以舟師造湘城軍達富口而弼遣杜弘出海昏時湓口騷動訪步上柴桑與賊戰斬首數百賊退保廬陵已而突圍出奔於臨賀又進訪龍驤將軍豫章太守賜爵尋陽縣侯時梁州賊帥杜曾等引兵向江陵經造沔口大為寇害元帝命訪擊之訪有眾八千進至沌陽遣李恒督左甄許朝督右甄訪自領中軍高張旗幟曾果畏訪先攻左右甄訪令其眾曰一甄敗鳴三鼓兩甄敗鳴六鼓自旦至申兩甄皆敗訪聞鼓音選精銳八百人自行酒飲之勅不得妄動聞鼓乃進

西漢志 卷九十二
賊未至三十步訪親鳴鼓將士皆騰躍奔赴曾大潰遂定漢沔以功遷梁州刺史屯襄陽務農訓卒威風既著遠近悅服智勇過人爲中興名將慨然有平河洛之志聞王敦有不臣之心訪恒切齒敦雖懷逆謀終訪之世未敢爲非初訪遇善相者謂訪與陶侃曰二君皆位至方嶽功名畧同但陶得上壽周當下壽耳侃小訪一歲卒時年六十一謚曰壯二子撫光同上

周撫字道和彊毅有父風元帝辟爲丞相掾襲爵除鷹揚將軍武昌太守王敦用爲從事中郎與鄧嶽俱爲爪牙敦敗撫與嶽亡走西陽蠻中明年詔原敦黨嶽撫詣闕請罪有詔禁錮之咸和初司徒王導以撫爲從事中郎出爲寧遠將軍江夏相蘇峻作逆撫從溫嶠討之峻平遷監沔北軍

事南中郎將鎮襄陽尋遷豫章太守益州刺史永和初桓溫征蜀進撫督梁州之漢中巴西梓潼陰平四郡軍事鎮彭模擊破蜀餘寇以功遷平西將軍隗文鄧定等復反立范賁爲帝有衆一萬撫擊破斬之進爵建城縣公征西督護蕭敬文作亂殺將軍楊謹據涪城自號益州牧桓溫令梁州刺史司馬勳等會撫伐之敬文固守自二月至八月乃出降撫斬之傳首京師升平中進鎮西將軍在益州三十餘年卒贈征西將軍謚曰襄子楚嗣同上

周光少有父風年十一見王敦敦謂曰貴郡未有將誰可用者光曰明公不恥下問竊謂無復見勝敦以爲寧遠將軍尋陽太守及敦舉兵光率千餘人赴之既至敦已死王應祕不言光遽見其兄撫曰王公已死兄何爲與錢鳳作賊

西漢志 卷九十二
三
衆並愕然其夕衆散錢鳳走出至闔廬洲光捕鳳詣闕贖
罪蘇峻作逆隨溫嶠力戰有功賜爵曲江男卒官 同上

周楚字元孫起家參征西軍事從父入蜀拜鷹揚將軍捷爲
太守父卒以楚監梁益二州假節襲爵建城公世在梁益
甚得物情時梁州刺史司馬勲作逆楚與朱序討平之太
和中蜀盜李金銀廣漢妖賊李弘並聚衆爲寇楚遣其子
討平之卒謚曰定子瓊勁烈有將畧歷數郡代楊亮爲梁
州刺史建武將軍領西戎校尉氏人竇衝反欲入漢川安
定人皇甫釗京兆人周勲等謀納衝瓊密知之收釗勲等
斬之尋卒子虓嗣 同上

周虓字孟威少有節操州名爲祭酒歷官梓潼太守寧康初
苻堅將楊安寇梓潼虓固守涪城遣步騎數千送母妻從

漢水將抵江陵爲堅將朱彤邀而獲之虓遂降於安堅欲
以爲尚書郎虓曰老母見獲失節於此母子獲全秦之惠
也雖公侯之貴不以爲榮况郎任乎堅乃止每入見堅輒
箕踞而坐呼爲氏賊堅黨以虓不遜屢請除之堅待之彌
厚後與堅兄子苞謀襲堅事泄堅引虓問狀虓曰昔漸離
豫讓燕智微臣猶漆身吞炭不忘忠節况虓世荷晉恩豈
敢忘也生爲晉臣死爲晉鬼復何問乎堅曰今殺之適成
其名徙太原後堅復陷順陽魏興獲二守皆執節不撓堅
歎曰周孟威不屈於前丁彥遠潔已於後吉祖冲不食而
死皆忠臣也虓竟以病卒於太原其子興迎喪冠軍將軍
謝玄親臨哭之上疏表其厲節寇庭嬰禍荒裔雖蘇武之
賢不復過也贈龍驤將軍益州刺史贍賜其家 同上

陶淡字處靜太尉侃之孫幼孤好導養之術謂仙道可祈年
十五六便服食絕穀不婚娶家累千金僮客百數淡終日
端拱曾不營問頗好讀易善卜筮於臨湘山中結廬養一
白鹿以自偶親故有候之者輒移渡澗水莫得近之州舉
秀才淡聞轉逃羅縣埤山中終身不返莫知所終同上
按陶淡人物志不載林志以入九江而晉書本傳不言
何許人今姑從之林志又訛以皇甫謐謝靈運為潯陽
人考諸史傳謐安定人靈運陳郡人也今皆削去

南北朝

漁父不知其姓名太康孫緬為尋陽太守逍遙渚際見一輕
舟凌波隱顯俄而漁父至神韻蕭灑垂綸長嘯緬問有魚
賣乎漁父笑而答曰其釣非釣寧賣魚者乎緬遂褰裳涉

水謂曰竊觀先生有道者也何晦用若是漁父曰僕山海
狂人不達世務未辨賤貧無論榮貴乃歌曰竹竿籊籊湖
水泔泔相忘為樂貪餌吞鈎非夷非惠聊以忘憂於是悠
然鼓棹而去南史

陶淵明字元亮潯陽柴桑人曾祖侃晉大司馬淵明少有高
趣博學善屬文嘗著五柳先生傳以自况時人謂之實錄
親老家貧起為州祭酒不堪吏職少日自解歸州召主簿
不就躬耕自資遂抱羸疾江州刺史檀道濟往候之偃卧
瘠餒有日矣道濟謂曰賢者處世天下無道則隱有道則
至今子生文明之世柰何自苦如此對曰潛也何敢望賢
志不及也後為鎮軍建威參軍謂親朋曰聊欲弦歌以為
三徑之資可乎執事者聞之以為彭澤令公田悉令吏種

西漢志 卷九十二
秫妻子固請種秫乃使二頃五十畝種秫五十畝種粳歲終會郡遣督郵至縣吏請束帶見之淵明歎曰吾豈能為五斗米折腰向鄉里小兒即日解綬去江州刺史王弘欲識之不能致也淵明嘗往廬山弘命淵明故人龐通之齎酒具於半道栗里之間邀之淵明有脚疾使一門生二兒舁籃輿既至欣然便共飲酌俄頃弘至亦無迕也先是顏延之在潯陽與淵明情款後為始安郡經過潯陽日造淵明飲焉臨去留二萬錢與淵明淵明悉遣送酒家稍就取酒嘗九月九日出宅邊菊叢中坐久之忽值弘送酒至即便就酌醉而歸淵明不解音律而蓄無弦琴一張每酒適輒撫弄以寄其意貴賤造之者有酒輒設淵明若先醉便語客我醉欲眠卿可去其真率如此郡將嘗候之值其釀

熟取頭上葛巾漉酒漉畢還復著之其妻翟氏亦能安勤苦與夫同志自以曾祖晉世宰輔恥復屈身後代自宋高祖王業漸隆不復肯仕元嘉四年將復徵命會卒時年六十三世號靖節先生

梁蕭統集

按靖節先生晉書宋書南史各有傳晉書云陶潛字元亮宋書則曰陶潛字淵明或云淵明名元亮南史因之又以淵明為深明與昭明太子所撰本傳皆不同蓋晉書南史成於唐人之手其諱淵固宜若休文與昭明同時去陶世且甚近何名與字亦復參差互異竊所未解人物志以為在晉名淵明入宋改名潛似為得之

張野字萊民居潯陽柴桑與淵明有婚姻契學兼華梵尤善屬文性孝友田宅悉推與弟一味之甘與九族共州舉秀

才南中郎府功曹州治中徵拜散騎常侍俱不就依遠公
習淨業及遠公卒為序稱門人世服其義義熙十四年與
家人別入室端坐而逝年六十九族子詮字秀碩尚情高
逸酷嗜典墳雖耕鋤猶帶經不釋徵散騎常侍不起庾悅
以其貧起為潯陽令笑曰古人以容膝為安若屈志就祿
何足為榮乃入廬山依遠公研窮釋典深有悟入宋景平
元年無疾而逝春秋六十五

蓮社高賢傳

周羅暉字公布九江尋陽人年十五善騎射任俠放蕩收聚
亡命陰習兵書仕陳為句容令從吳明徹與齊師戰於江
陽為流矢中左目躍馬突進斬首不可勝紀進師徐州與
周將梁士彥戰於彭城勇冠三軍以功封始安縣伯總檢
校揚州中外諸軍事賜金銀三千兩盡散之將士陳宣帝

深美之出為晉陵太守進爵為侯使持節都督豫章十郡
諸軍事豫章內史獄訟庭決不關吏手人懷其惠立碑頌
德至德中都督南州江州司馬吳世興密奏羅暉擁眾嶺
表意在難測蕭摩訶等保明之除太子左衛率時參宴席
詩每前成都官尚書孔範曰羅暉執筆製詩還如上馬入
陣不在人後自是益見親禮及隋伐陳羅暉督軍以拒及
陳主被擒上江猶不下晉王廣遣陳主手書命之羅暉與
諸將大臨三日放兵士散乃降高祖慰諭之許以富貴羅
暉垂涕對曰本朝淪亡臣無節可紀陛下所賜獲全為幸
富貴非所望帝甚器之拜上儀同三司鼓吹羽儀送之於
宅歷幽涇二州刺史開皇十八年征遼東徵為水軍總管
自東萊泛海趣平壤城遭風船多漂沒無功而旋突厥犯

塞從楊素致討羅睺先登大破之進大將軍賜爵義寧郡公煬帝即位授右武侯大將軍副楊素討平漢王諒進上大將軍及陳主卒羅睺請一臨哭許之衰經送至墓葬還釋服然後入朝世稱其有禮時諒餘黨據絳晉等三州詔羅睺進兵圍之中流矢卒送柩還京行數里輿馬自止策之不動有風旋遶焉絳州長史郭雅稽首祝曰公恨小寇未平耶尋即殄滅無為戀恨是時風靜馬行見者莫不悲歎其年七月子仲隱夢羅睺曰我明日當戰其靈坐所有弓箭刀劔無故自動若人帶持之狀絳州城陷是其日也贈柱國右翊衛大將軍謚曰壯子仲安位上開府

北史

唐

陶峴潛之裔孫開元中移居崑山與孟彥深孟雲卿焦遂游

嘗製三舟一自載一供賓客一置飲饌有女樂一部奏清商之曲逢林泉則窮其景物吳越之士謂之水仙其西塞山下回舟詩有云匡廬舊業是誰主吳越新居安此生白髮數莖歸未得青山一望草還成

全唐詩話

陳伯宣陳宜都王之後避難泉州與馬總善注司馬遷史記行於世後遊廬山居德安以著作佐郎名不起大順初卒子崇為江州長史益置田園為家法僖宗時嘗旌其門南唐又為立義門免其徭役

史傳

按人物志安志唐代絕無一人今采以上二人補入陳伯宣事見宋史陳兢傳首林志訛載元結入瑞昌人物考唐書元結傳不著何許人全唐詩序則云河南人又豫章書訛載楊收入九江人物考唐書楊收傳自言越

國公素之裔世居馮翊因傳中有涑陽耕得古鐘云云
遂改涑作潯其紕繆尤甚今皆削去

後五代

周勅瑞昌人天祐初亂勅以勇敏應江西防遏使司徒鍾傳
表補江州軍總管陞御史中丞領尚書事時羣雄割據無
敢窺江淮者勅之功居多

林志

江夢孫字聿修潯陽人烈祖輔吳表為祕書郎夢孫自言迂
儒無裨益欲小試於治民求為縣令乃補天長令烈祖先
持告身示之曰今日受此明日趣走庭下矣曰此素志也
庸何傷及至天長吏白縣署正寢有淫厲不可居夢孫不
從是夕果有怪並出夢孫起焚香曰受命為令當治事於
此鬼神有祠廟丘壟何不各歸其所語訖皆斂迹夢孫治

縣寬簡吏民安之逾年棄官還家事繼母盡孝為諸生講
禮釋經義凡至疑處輒斂衽曰此科先儒猶多異同夢孫
安敢輕言諸君自擇所長可也南唐保大中卒年八十五

贈國子司業

陸游南唐書

陳褒江州德安縣人唐給事中京之後十世同居長幼七百
餘人不置奴婢日會食堂上男女異席朱冠笄者又為一
席畜犬百餘共以一船貯食飼之一犬不至羣犬皆不食
築書樓延四方學者鄉鄰化其德獄訟為之衰息昇元初
州以聞復徭役表門閭

同上

宋

夏承皓字靈石德安人太宗時上平晉策遷右侍禁契丹內
寇承皓由間道發兵與契丹遇戰沒於河朔褒贈崇儀使

馬適湖口人祖良俊葬幘頭山讖言沙洲圓出狀元已而生
適慧悟勤敏嗜學建隆二年以文學高等擢進士第一人
事母篤孝母卒居廬毀瘠卒於家

府志

許祚江州德化人八世同居長幼七百八十一口太平興國
七年旌其門閭淳化二年本州言祚家春夏常乏食詔歲
貸米千斛

宋史

陳兢江州德安人陳宜都王叔明之後十三世同居長幼七
百口不畜僕妾上下媿睦人無間言建書樓於別墅延四
方之士肄業者多依焉鄉里率化爭訟稀少開寶初平江
南知州張齊上請免其徭役昉弟之子鴻太平興國七年
江南轉運使張齊賢又奏免雜科兢即鴻之弟淳化元年

知州康戩又上言兢家常苦食不足詔本州每歲貸粟二
千石後兢死其從父弟旭每歲止受貸粟之半云省嗇而
食可以及秋成屬歲儉穀貴或勸其全受而糶之可邀善
價旭曰朝廷以旭家羣從千口軫其乏食貸以公粟豈可
見利忘義爲罔上之事乎至道初遣內侍裴愈就賜御書
還言旭家孝友儉讓近於淳古太宗嘗對近臣言之叅知
政事張洎對曰旭宗族千餘口世守家法孝謹不衰閨門
之內肅於公府且言及旭受貸事上以遠民義聚復能固
廉節爲之歎息大中祥符四年以旭爲江州助教旭卒弟
蘊主家事天聖元年又以蘊繼爲助教蘊卒弟泰主之泰
弟度太子中舍致仕從子延賞可並舉進士延賞職方員
外郎

宋史

夏竦字子喬父承皓與契丹戰沒於河朔竦以死事恩授丹陽簿上書乞應制舉擢光祿寺丞遷右正言真宗幸亳州為東京留守推官仁宗封慶國公宰相王旦薦竦才命教慶國公書未幾同修起居注是時君臣爭言符瑞竦獨抗疏以為不可出知襄州歲饑全活數萬人歷洪州洪俗信巫竦索部中得巫一千九百餘家毀其淫祠以聞朝廷詔江淮以南皆嚴禁絕天聖中因王欽若圖進取復知制誥累遷尚書左丞元昊叛拜陝西經畧使徙判河中召拜樞密使以諫官御史言遂罷又數年召以為相制下而言者又謂竦與陳執中不協不可共事遂改樞密封英國公皇祐元年改封鄭國公卒贈太師賜謚文正考功以竦行不應謚改曰文莊

東都事畧

按竦始則諫止符瑞繼為玉清昭應宮判官輒附會神怪僥倖取進迹其生平純疵互見當時至以姦邪目之似乎近苛若舊志及豫章書稱揚太過又未免失實今從史傳節存其概云

胡旦德安人父清娶義門陳氏生旦咸平間進士累遷兵部郎中直祕閣五世孫清紹興十三年授羽衛大夫貴州防禦使有茂績於民封武功縣開國男食邑三百戶

府志

羅彧景德中扈駕親征至澶淵與宰相參議軍務上遣彧使邊賜以紫金帶還鄉領本貫江州刺史

人物志

陳巽字公順德化人祥符八年進士及第歷常州團練推官補武安節推時侍御李偕守武安事倚巽決凡二十四獄人皆服其平用薦改著作佐郎知廬陵縣先是樞密副使

西江志 卷九十二
姜遵嘗為廬陵民德之至是有前姜後陳之諺移知資州
通判潭州時溪蠻犯約知州事劉夔劉沅繼出行徼吳內
修民事外奉師費凡輸粟帛金錢四十八萬兵械稱之用
足於軍而賦役不加於民歷知撫州蜀州蘄州所至有惠
政以目疾請老英宗即位遷祕書監性好學聲音星曆之
技無所不知 曾南豐集

按陳巽林志失載人物志以為星子人今據曾子固所
撰神道碑改入九江

王韶字子純江州德安人舉進士調建昌軍司理叅軍因客
遊西邊時神宗初立韶內知天子智勇有志於天下乃上
平戎策曰國家欲制西夏當復河湟河湟復則西夏有腹
背之憂自唐乾元以後吐蕃陷河隴至今董氊不能制諸

羌而人自為部莫相統一宜以時并有之以絕夏人之右
臂凡數千言神宗覽而奇之召問方略以為秦鳳路經略
司機宜文字親帥數騎直抵青唐渭源諸羌帳中招諭之
且留宿以示不疑青唐渭源皆遣其族隨韶歸附改保平
軍節度推官名對因言營田互市之利從之改提舉鳳翔
西京節度使兼管營田市易公事熙寧三年詔奏墾田數
知秦州李師中言其不實奪一官既而加太子中允祕閣
校理五年改古渭砦為通遠軍以韶兼知軍會木征度洮
來寇韶語諸將曰若官軍至武勝則抹邦山可一舉而定
即趨武勝遇木征首領瞎藥等與戰破之遂城武勝賜名
鎮洮軍復遣將擊破木征木征走弟結吳延征舉其族二
千餘人并大首領李蘭羶等出降陞鎮洮軍為熙州以熙

州洮岷州通遠軍爲一路即熙州爲帥府進韶龍圖閣待制知熙州行軍五十四日涉千八百里復州五辟地東西千里斬首三千餘級獲牛羊馬以萬計以功遷端明殿學士兼龍圖閣學士左諫議大夫入覲進資政殿學士兼制置涇原秦鳳軍馬糧草韶還至興平會知河州景思立出兵踏白城敗績賊圍河州韶曰賊所以圖河州者恃有外援也今知救至必設伏以待我不若以兵直趨定羌遣將破耳金欺當二族進次寧河分兵討南山羌賊賊失援驚潰初思立輕敵覆軍賊勢復振而京師風霾旱災連仍論者欲棄河湟神宗爲之旰食數遣中使戒韶駐熙州持重勿出及是捷聞神宗大喜賜詔嘉之韶還熙州遣將以兵循西山出踏白後賊黨望風奔潰斬獲甚衆於是木征請

降進觀文殿學士禮部侍郎七年拜樞密副使以母老丐外任除觀文殿學士戶部侍郎知洪州以表謝上御史蔡確言其罔慢落職知鄂州久之還舊職復知洪州卒年五十二謚曰襄敏子厚爲將有功端徽宗時爲顯謨閣待制

宋嘗著作東觀後爲兵部侍郎以左道誅

東都事略

李受德化人爲太子少保乞歸廬山哲宗詔王珪司馬光呂公著等餞飲於資政堂賦詩以贈之其弟東之以經筵官乞歸詔亦命珪等餞送如受當時以比二疏云

林志

王厚字處道少從父韶兵閒習羌事以父任爲大理評事後以文易武爲禮賓副使佐熙河帥府會吐蕃種落亂其王瞎征隴拶爭國厚與河州守將王瞻欲招徠羌人復故地師出塞下邈川諸城瞎征以其屬來降厚次青唐隴拶擁

萬騎出迎遂定青唐元符末湟鄯不守厚坐貶崇寧初復
故官自湟鄯棄畔羌多羅巴等迎隴拶之弟曰溪賒羅撒
復國朝廷賜隴拶姓名曰趙懷德令還邈川溪賒羅撒之
黨謀掩殺之懷德懼奔河南議者謂諸羌連結且生邊患
朝廷方謀鎮輯而大臣有薦厚者賜對命知河州兼經略
使厚請擇人以自助遣童貫與偕至乃如京玉關厚請進
兵邈川與諸將分部而進於是高永年為統制官以兵三
萬出京玉厚以兵三萬出安鄉多羅巴結連鄯郭兵衆未
會使其三子以數萬人據險自守進擊敗之俱遁進至湟
州攻三日拔之以功拜威州團練使帥熙河溪巴温之妻
大掌牟率諸部籍土地請降三年厚命高永年以左軍循
宗水張誠以右軍出宗谷厚以中軍出綏遠會於宗哥川

溪賒羅撒置陳倚北山厚以中軍登山攻其背自督强弩
迎射之賊大敗溪賒羅撒以一騎馳去未至鄯州五里偽
國主龜茲公主曹宜結牟及大酋李阿温率衆開門降更
鄯州曰西寧州拜武勝軍留後以牽制夏人坐逗留降鄯
州防禦使初大掌牟之入見也徽宗親撫諭使歸而誘致
其子至是趙懷德遣使約降猶豫未決厚以書諭之懷德
遂送款復武勝軍留後還朝提舉中太一宮卒贈寧遠軍
節度使謚曰莊敏東都事略

王寓

一作寓

字元忠江州人父易簡資政殿學士寓歷校書郎

著作佐郎度支員外郎兼充編修官國子司業為起居舍
人改中書舍人兼蕃衍宅直講欽宗立以給事中命兼邇
英殿經筵侍講轉吏部侍郎陞禮部尚書翰林學士康王

之使金也以寓爲尚書左丞副之乞免貶單州團練使建
炎中賊馬進破江州被害

林志

張夢祥彭澤人宣和進士欽宗北行夢祥被執不屈金主義
而釋之退隱仁磯終身不仕號曰仁山先生

同上

陳士尹字彥衡德安人建炎初與武寧李彥先同應詔勤王
時號三將軍在軍中十五年忠義激烈奮不顧身與金人
鏖戰屢奏功後與李彥先同沒於陣事聞贈保義郎淮西
統制兵馬使勅立碑祀之

人物志

連萬夫德安人補將仕郎建炎四年羣賊犯應山萬夫率邑
人數千保山砦賊不能犯寇浪子者以兵至圍之二日卒
破之賊知萬夫勇敢有謀欲留爲用萬夫怒厲聲罵賊爲
所害贈右承務郎官其家一人

宋史

王阮字南卿江州人父彥傳靖康勤王有功阮少好學尚氣
節自稱將種嘗謁袁州太守張栻栻謂曰當今道在武夷
子盍往求之阮見朱子於考亭與語大說之登隆興元年
進士時孝宗初即位有詔經理建業以圖進取而大臣翼
懦幸安計未決阮試禮部對策曰臨安蟠幽宅阻面湖背
海膏腴沃野足以休養生聚其地利於休息建康東南重
鎮控制長江呼吸之間上下千里足以虎視吳楚應接梁
宋其地利於進取建炎紹興間敵人乘勝長驅直擣而我
師亦甚憊上皇遵養時晦迺駐臨安所以爲休息計也主
上獨見遠覽舉而措諸事業非固以臨安爲不足居也戰
守之形旣分動靜進退理異也今東南王氣鍾在建鄴長
江千里控扼所會輟而弗顧退守幽深之地若將終身焉

西江志 卷九十二
如是而曰謀國果得為善謀乎古人有言千里之行起於足下人患不為爾知貢舉范成大得而讀之嘆曰是人傑也調南康都昌主簿以廉聲聞移永州教授獻書闕下請罷吳楚牧馬之政而積馬於蜀茶馬司以省往來綱驛之費歲時分牧之資凡數千言紹熙中知濠州請復曹瑋方田修種世衡射法日講守備與邊民親訪北境事宜終阮在濠金不敢南侵改撫州韓侂胄宿聞阮名特命入奏夜遣密客詣阮阮不答私謂所親曰吾聞公卿擇士士亦擇公卿劉歆柳宗元失身匪人為萬世笑今政自韓氏出吾肯出其門哉陞對畢拂衣出關侂胄大怒批旨予祠阮於是歸隱廬山盡棄人間事從容觴詠而已嘉定元年卒

宋史

權安節字信之九江人知臨江軍時江水齧岸多至傾圮安節請於朝得緡錢若干重築之民甚賴焉

林志

蔡元思德安人朱文公守南康時講學於白鹿洞元思從之遊隱居求志樂道不仕文公沒心喪三年又以事文公者事黃直卿而卒業焉晚與同門數人每季月一集以相切磋如此者三十年州間服行其化

人物志

按蔡元思事詳見虞道園蔡氏義學記

周舜弼瑞昌人與弟亨仲從子仿嘗從朱子講學於白鹿洞立身行己一以聖賢為師朱門號稱高弟隱居不仕

同上

高天錫字竹澗彭澤人宋季嚴禁道學考亭之學幾廢天錫獨究心審華實辨理欲往來白鹿洞學者咸敬信之卒之日俄云我欲還造化舊物矣奄然而逝後祠鄉賢

安志

吳元字季誠德安人開禧元年與其弟宏愈三人同舉進士元官知制誥累贈正議大夫宏字季剛官饒州司戶愈字季謙初尉信陽金人圍信陽守令皆遜去愈獨嚴兵禦之以帛十餘丈作大旗一特題吳愈二字敵衆望見不測遂舍之去歷官沿江制置使兼知鄂州入直翰苑官兵部侍郎卒贈光祿大夫少師謚文肅

林志

吳革字時夫元子三領舉於漕肄業白鹿書院任撫州崇仁尉累官文華閣學士沿江制置使江東安撫知建康府兼淮西總領每以崇正學基化本宣德達情爲己任卒贈光祿大夫謚清惠

人物志

王登字景宗德安人少讀書喜古兵法慷慨有大志不事生產淳祐四年舉進士調興山主簿賈似道檄修江陵城條

畫有法制置使李曾伯經理襄陽登在行尋以母憂去及吳淵爲制置使邊事甚亟憶登才略具書帛招之登方與客奕發書衣冠拜家廟長指出門問牛幾何可盡發犒師淵慨然曰事亟矣柰何登曰亟呼諸將共議衆至驩躍曰景宗在此淵曰汝輩欲西門出景宗欲從方城如何衆曰惟命登曰用兵患不一登書生不過憑軾觀戰請五大帥中擇一人爲節制淵曰請監丞出正爲此也即書銀牌曰監丞代某親行將士用命不用命賞罰畢具登至沙市椎牛醜酒得七千人誓曰登與諸將義同骨肉今日之事登不用命諸將殺登以獻主帥諸將有一不用命登有制劄在不敢私也衆股慄聽命竟立奇功於沮河趙葵爲制置使見登握手曰景宗一身膽惜相見晚也俾參宣撫司兼

京西兩節馬光祖為制置使辟充參謀官遷軍器少監京
西提點刑獄開慶元年提兵援蜀約日合戰夜分登經理
軍事忽絕倒五藏出血俄而卒

宋史

顏希孔彭澤人為本縣簿宋末元師南下取安慶江州希孔
率民兵八百人大聚舟楫各載石萬計戰於江中飛石四
擊敵舟幾敗已而石盡力屈被害民為葬其骨於鳳凰山

麓人物志

戴羽德安人隱居積學徵辟皆不就著武戾通傳三卷史評

一卷虞道園為之序

明一統志

元

趙復字仁甫德安人太宗命太子濶出帥師伐宋德安以嘗
逆戰其民數十萬皆俘戮無遺時楊惟中行中書省姚樞

奉詔即軍中求儒道釋醫卜士凡儒生掛俘籍者輒脫之
以歸復在其中以九族俱殘不欲北因與樞訣樞恐其自
裁留帳中共宿既覺月色皓然惟寢衣在遽馳馬周號積
屍間無有也行及水際則復已被髮徒跣仰天而號欲投
水而未入樞曉以徒死無益隨吾而北必可無他復強從
之先是南北道絕載籍不相通至是復以程朱所著諸經
傳註盡錄以付樞自復至燕學子從者百餘人世祖在潛
邸嘗召見問曰我欲取宋卿可導之乎對曰宋吾父母國
也未有引他人以伐吾父母者世祖因不强之仕惟中間
復議論始嗜其學乃與樞謀建太極書院立周子祠以二
程張楊游朱六君子配食選取遺書八千餘卷請復講授
其中復以周程而後其書廣博學者未能貫通乃原義農

西江志 卷九十二
堯舜所以繼天立極孔子顏孟所以垂世立教周程張朱氏所以發明紹續者作傳道圖而以書目條列於後別著伊洛發揮以標其宗旨朱子門人散在四方則以見諸登載與得諸傳聞者共五十有三人作師友圖以寓私淑之志樞旣退隱蘇門乃即復傳其學由是許衡郝經劉因皆得其書而尊信之北方知有程朱之學自復始 元史
柳從龍字雲卿九江人志行卓然年長於吳草廬而學於吳家闡闡之中築精舍曰靜虛晨省之暇飽玩聖賢之書草廬為作靜虛精舍記 據吳文正公集改撰
李時彭澤人母病思魚羹筌求於港終日弗得俄有一叟過問知其意導之曰此宜舉筌遂得一鯉歸奉母病乃痊
林志

甘楚枋德安人學通五經有盛名於世元興以明經舉進士楚枋屢為江浙湖廣河南行省典試官稱為得人後官武岡縣令 府志

吳觀字賓夫宏子兩試漕舉世濟其美至元間知分寧縣括私帑置田數百畝立存惠倉以賑貧民去後民為立祠累官朝請大夫湖廣提刑兼知衡州轉江西提刑兼知贛州又轉江東提刑知饒州皆有政聲 人物志

劉受二五柳鄉人至正間以貢任池州府推官張士誠倡亂受二戰於城西渡口敗績眾皆逃受二還城死守城陷不屈死之 同上

明

黃信彭澤人歲貢入監洪武末任湖廣道御史歷廣西按察

使晉湖廣布政使至右副都御史剛方不屈深得紀綱之體論彭澤德望者信為首稱云

人物志

劉隆字尚文彭澤人洪武中由監生擢廣州府同知勤於政事晉福建參議俄轉廣西閩之士庶上疏懇留遂陞福建按察使巡視海道備倭甚整在官三十餘年操守如一分

省人物考

孫復字明德九江人元至正間隨其父掾廬陵日從經師學士遊比壯通春秋大義壬辰春蘄兵倡亂首陷江州乃與其兄亡走池州王師自建康分遣總制何文輝將兵取池州所至施恩著信民稍稍來附尤極意搜延士類或以復見與語奇之即留置幕下己亥從守龍江以防東寇時陳友諒假名號據上流勢岌岌相軋上親率大軍往討之復

從軍西上時時被堅執銳雜行伍中既而陳氏不敵狼顧鼠竄及師過安慶陳守將聞江州破已先遁掠陣官韓某以城降城中餘衆尚數千人遣復入城撫諭比至韓不見信使勇士數十人列階下側目露刃相視復不為動從容正色撫以恩信衆為之逡巡退却乃還壬寅羅友賢復據貴池東流諸縣以叛屢招之不下令復往諭之即日就道既見為之宣揚威令陳述禍福請以八月出謝既而過期不至有旨命遣人再諭之乃遣宣使安中與俱時羅帥出駐城山留館中數日不得見至夜半忽有兵百餘人呼譟而至復與安中俱被劫縛將加刃焉復大呼曰朝廷待汝寬厚汝自負恩失信至此而猶不知悔耶吾奉命再來救若等性命耳何得反加害言已衆稍靡未明羅帥遣人先

西漢志 卷九十二
釋復縛且謝過歸罪其下至日中大陳兵衛請相見設酒饌而安中仍拘繫他所時所持書檄已為劫去復以口舌代之反覆數百千言其人內懷猶豫復遂力求歸惟留安中不遣復曰吾二人奉使出疆同一命也豈有一去一留之理若安中不遣而余獨歸朝廷若問安中某將何辭以對顧得歸亦死寧不得歸請與安中同死於此詞氣慷慨羅帥為之感動即令與安中等俱還既而文輝調守江西拜行省參知政事欲薦之不可命其子拜而師事之 劉職

方集

張羽字來儀潯陽人從父宦江浙兵阻不得歸與友徐賁約卜居吳興領鄉薦為安定書院山長再徙於吳與高啓楊基輩為詩友洪武四年徵至京師應對不稱旨放還再徵

授太常司丞上親述滁陽王事實命羽撰廟碑以事竄嶺表未半道召還羽自知不免投龍江以死羽文章精潔有法尤長於詩作畫師小米 明史藁

按張羽林志失載人物志載其赴召歷官事多舛譌今據史傳增改所著有靜居集六卷

歐陽尚誠彭澤人以孝友著稱元末率眾訓練為邑保障高皇帝征陳友諒尚誠率其眾齎牛酒勞師友諒平召至京師授世襲本縣令力辭授本縣丞終其身仍賜鐵券銀器遣歸弟尚八從征遇害既已喪元猶乘騎奔走如生至家乃墮鄉黨神而祠之洪武乙巳尚誠平洪懸洪黨復讐尚八妻謂其妾曰吾懼為洪懸所辱遂閉門自焚死 人物志

吳禮德化人洪武中官金華知縣調嘉興歷河南西平煩劇

之地皆以廉能稱擢知河曲州改濟寧後以雲南大理同知致政崇祀鄉賢祠

府志

謝敬湖口人洪武中任四川道御史直道自信糾彈不避權勢以廉能稱

林志

周璟瑞昌人洪武丙子舉於鄉官刑科給事中永樂間以邊餉功擢山西左布政使九年考績士民上疏懇留復任二十一年正統初致仕

人物志

周泰亨彭澤人永樂進士任廣西道御史巡按直隸湖廣克

貞憲度百僚肅清終湖廣按察僉事

府志

王賢字茂先德化人性質直略涉經史尤善於醫永樂間以賢良方正薦辭不就惟以醫藥濟人不責其報一日於玉波橋畔拾遺金一餅於其所候失金者歸之卒年九十三

人以爲陰德所致

明一統志

史中德化人永樂中由太學生任衡州通判守法恤民不憚

豪貴尋擢本州太守有中使貪橫經衡州中搜詰其舟密

奏於朝詔命誅之後轉陝西左參政致仕卒

人物志

游瑞德化人永樂中由歲貢任給事中陞鎮江府知府有惠

政在郡十八年致仕士民懷之

明一統志

燕善德化人永樂癸卯舉於鄉任湖廣武陵縣令馭吏以嚴撫民以寬號爲良吏入覲受勅旌異尋擢太僕寺丞

府志

周振德安人永樂進士任浙江道監察御史間行伺察悉知

民隱按治貪墨無所假貸陞廣東僉事釐革宿弊嶺南肅

清

同上

豐慶瑞昌人正統進士任兵科給事中歷官河南左布政使

後占籍鄞縣子耘為湖口訓導耘子熙翰林學士熙子坊
解元進士代有文名 林志

駱敏湖口人正統進士任湖廣僉事時楚藩不法敏密疏上
聞遂掛冠歸後徵為祭酒不起詔有司月給俸廩優異之
人物志

呂鐸字文振德化人正統進士官兵部主事成化間轉山東
右參議進浙江左參政為人寬簡與物無競又性廉潔內
帑賑邊故事得私其羨鐸秋毫不染朝野重之 府志

勞鉞字廷器德化人景泰進士歷江浦臨清山陽三縣俱有
政聲成化中晉太僕寺丞出知湖州有惠政卒官祀為城
隍神焉族子堪號廬岳嘉靖進士官至副都御史博學能
文所著有憲章類編詩海溯源柴桑子書行世 人物志

按勞鉞所輯湖州府志頗稱善本

史珍字廷玉德化人中之子景泰進士知宿遷縣簡費愛民
不憚權貴獄獄有父風不為當道所悅稍遷鎮江府通判
解綬歸 同上

柯茂湖口人景泰四年舉於鄉任樂昌令以儉素率民凡民
間服用婚葬侈靡者痛抑之九年秩滿當遷民奏留之又
三年乃致仕歸 同上

王恕字南忠湖口人景泰進士任兵部主事恕諳天象兼精
兵法累官廣東參議時征猺寇恕提兵隨韓雍後將帥倚
恕進止猺以之平 府志

夏英字育才德化人成化進士授南工部主事陞郎中有經
畫才陞延平知府改邵武下勸農桑之令均徭役廣儲蓄

有聲八閩卒於官所著有方田集 人物志

廖紀字惟修九江衛人弘治進士授浙江安吉知州擢南職

方副郎轉都水郎尋改營繕奉公執法多忤權勢出知延

平府又歷平陽皆有政聲嘉靖五年進廣西按察副使征

思恩田州叛苗遘疾卒 府志

王廷翰彭澤人勇敢有為正德己卯逆濠作亂游兵劫境廷

翰率子弟鄉兵奮前擊賊矢盡力窮卒為所害 林志

黃材德化人讀書崇禮性孝友一日因父病篤藥不能療乃

焚香籲天引刀割左股肉和粥進之後父沒妻見其股瘡

詢之始知其故鄉里莫不歎服 明一統志

柳邦傑號匡廬德化人正德丙子鄉舉宸濠叛潯城不守邦

傑以二親老莫能行扶抱號泣賊感其孝得釋謁選同知

瓊州府事黎氏倡亂單騎往輯望風解散以奏績入都遂

致仕歸里杜門樂道益肆力於詩古文辭著有匡廬小集

人物志

方庸字文中湖口人少業儒好義逆濠兵及湖口庸率兵拒

敵衆潰被執不屈遂遇害 府志

丁湛字子一彭澤人嘉靖進士累官禮科都給事時分宜當

國湛疏發其奸詔杖闕下幾斃鐫秩量移南曹進四川參

議浙江副使既考績四閱月矣值黃巖失守分宜猶追罪

之坐落職分宜既敗即家起官廣西參政按察使不赴人

物志

張準字立之德化人嘉靖辛卯鄉薦任寶應知縣縣衝疲多

水患準築堤安民至今有張公堤擢雷州同知討廣黎有

功雷人刻石以紀陞福建鹽運同知與時不合遂乞歸

同上

陶欽夔字克諧彭澤人嘉靖進士授大理評事改御史世宗巡郅中欽夔以扈蹕行時上嚴明羣臣兢兢救過不贍河南御史坐謫戍上命擇可者以聞衆推欽夔遂被命百務倥偬皆咄嗟以辦河南饑疏請帑金數萬全活甚多北敵入寇上疏引宋司馬韓范諸公以責分宜分宜銜之例補太倉兵備歷襄陽辰沅五溪蠻反欽夔用計擒其酋龍許保餘黨悉平陞湖廣按察使轉河南左布政使告歸終於家

同上

陶欽臯字克允生而穎異八歲能文日覽千言終身成誦嘉靖進士授刑部主事尋改御史因爭東廠擅擬人命官

呼為大膽御史即欽夔胞弟也

同上

萬衣號淺源德化人嘉靖進士初授南刑部主事頻夢其父心動請急歸抵家九日而父沒服闋補北刑部奉命讞楚獄多所平反轉曲靖副使曲靖苗民雜處時有騷動調劑安堵不復為患遷福建布政使時倭犯興化告急衣夜從間道趨莆田設奇兵待之賊薄城下斬首無算累官至河南左布政使積羨萬餘金盡以實常平諸倉今中州尚號為萬公倉云未幾歸築草堂開三逕為物外遊卒年八十一著有草禺子匡廬圖考人紀新書藏於家

府志

余文獻字可徵德化人嘉靖進士博學善為文與婁東濟南顏頤相上下海內爭傳之性至孝官大參遂請養築慈壽堂以奉母旦夕不離左右居艱時凡四方書問皆不報服

西江志 卷九十二
關乃補謝焉是時嚴嵩柄國以文獻同鄉遣子世蕃招致之絕不一往官兵部時員外郎楊繼盛得罪嵩致之死凡獄中飲食藥餌及家人安置撫綏一出於文獻事見椒山自序年譜中 人物志

按余文獻事詳見文德翼求是堂集中所著有九厓集蔡文魁號斂齋德化人嘉靖進士晉戶科給事轉通政司叅議秩滿廷推巡撫鄖陽因忤時相意竟委政而歸在林下三十年以講學為事穆宗立召用辭不赴 同上

歐陽一敬字司直彭澤人嘉靖進士除蕭山知縣徵授刑科給事中劾罷禮部尚書董份遷兵科都給事言廣西總兵不當用勲臣因劾恭順侯吳繼爵罷之以俞大猷代寇大入陝西劾總督陳其學巡撫戴才俱奪官又以軍政劾英

國公張溶山西浙江總兵官董一奎等九人不職俱貶斥自嚴嵩敗言官爭發憤論事一敬尤敢言隆慶初新鄭相高拱當國一敬劾拱威制朝紳專柄擅國亟宜罷黜已而陳兵政八事部皆議行南京振武營兵由是罷去積患遂除中官呂用等典京營一敬力諫事寢俄擢太常少卿拱再起柄政一敬即日告歸 明史藁

張科字達泉湖口人以進士為中書舍人中祕書多鈔以歸改御史巡浙江與胡宗憲不相下彈抨之遂請致仕時年二十八歲耳戚黨有與江陵相交厚者絕不一跡其家五十餘年悠優林下稍以聲色自晦人莫測其所操云 求是堂集

夏可範字子極瑞昌人嘉靖進士授刑部主事轉員外郎奉

命錄囚見桁楊相望為求生不得垂涕曰匍匐入井伊誰之咎隱痛成疾而卒所著有龍溪集

人物志

按文德翼龍溪集序稱為隆萬間進士蓋失考也

段孟賢號蒙岡湖口人嘉靖進士授刑部主事調同知亳州改判温州理糧儲常供外不入一錢轉知都勻案牘盈前立時裁決為文汪洋淳蓄灑灑千言蕭然舊廬不飾一椽性孝友父初艱嗣舉一姪為後友愛如同胞數十年猶共爨焉

同上

桂枝揚德安人嘉靖進士少聰穎以神童稱事嫡母盡孝官吏部主事舉錯黜陟一秉至公居官清儉服食仍取給於家云

府志

張道號性泉湖口人嘉靖進士知餘姚縣補知秀水擢御史

按眎浙江風肅一時尋告歸不治生產冰檠自勵卒於家崇祀名宦

同上

朱衮字文龍德化人嘉靖辛酉鄉薦由莆田教諭知南靖歷知武城松陽潔已愛民興利剔弊俱立祠祀之晉宛平輦下機務煩劇中官復干擾難制衮風裁嚴峻人不敢干以私臺省交章薦之擢刑部郎清滯獄理冤抑計三年全活者百餘人出守思恩數月即致仕任宛日捐俸置九江會館買地置義冢人至今德之卒年九十有五人

人物志

蔡廷臣字蓋卿德化人嘉靖進士司理嘉興晉御史按黔土司安國亨逼殺其叔時議興師征之廷臣單騎入其營曉諭禍福國亨叩首馬前輸金贖罪廷臣性耿直不徇江陵私請由順天巡按備兵信陽以山西右轄掛冠歸

同上

時邦曉彭澤人性輕財樂施嘉靖甲戌歲大饑疫道殣相望
邦曉多為賑貸不責償出州地四千畝給種力令親友分
種歲稔遂不復取息萬曆己丑歲復侵遠近遏糴不許曰
吾積穀以備荒也豈為殖乎人各給穀少者斗許多者石
計亦不取償

府志

董伯益樂安人徙居瑞昌黃沙以漁為業家累萬金散其資
給窮人瘞漂尸振寒士其後董昂者伯益疏屬也有膽智
修建謝元暉墓起謝東山祠逆濠將脅其子諸生董朝翰
以千金贖歸拊其背曰千金活汝亦幾殺汝盡散之貧人
自捕魚澤中

人物志

陳思字再可瑞昌人以貢授安吉州訓導未及期歎曰冗員
哉投牒請裁自身始牒上即行有司計其常祿及諸生餽

遺遣人齋至其家思授使者歸報令置學田浙有廉官錄
思其一也

同上

王之垣號蠡澤德化人事母極孝母病篤醫無效垣為嘗糞
每旦夕焚香對天默禱病遂愈隆慶庚午鄉薦任福建漳
平知縣清介自矢秩滿解綬歸鄉杜門謝客太守張養源
題其間曰大孝高隱壽八十四

同上

彭國光號秀角德化人萬曆進士知晉江行取吏科給事凡
利害興革有裨國是者直言不避遷通州副使尋巡撫宣
府時各省告歉國光捐歷俸解部資賑遠近德之卒於官
勅賜半葬

府志

吳尚友號益齋湖口人萬曆進士在刑曹勲戚殺人時相親
屬貪墨並寘之法有揮使以金珠賄獄立斥之湖口稅監

李道擅作威福獨傾心於尚友請謁卒拒不見歸里置義田以贍宗族著有禮編會講文集同上

郭一輪字仁宇德安人萬曆進士知海寧性耿介不事逢迎因調知南安怡然曰拙宦速謗所固然也已任工部屯田司主事未幾卒人物志

萬嗣達字禹存衣子萬曆辛卯舉人歷官雲南金滄道副使告歸凡地方利病侃侃言之不避嫌居官清介治家孝友一遵父訓卒年七十有八子堯一以崇禎庚辰特用累官工部主事孫邦和以薦辟任大理知府同上

許汝魁號仰亭湖口人萬曆進士知常山調上海大修水利軍例給白米數萬石歲凶無辦會開河之役汝魁自坐日中命進麥飯食之且甘軍士感動咸願以麥代米省金錢

數萬奏績除南京吏部遷荆西道移榆林值邊警鼓勵三軍斬首數百三年五戰皆捷朝廷降勅褒之蔭一子遷至左轄尋擢南京光祿轉通政使卒於官同上

王演疇字孟箕彭澤人萬曆進士任南京工部陞廣西桂林知府乞休歸家無長物雅好著書善賦工真草鏤板刻石慕其筆者不減二王其涉筆四六亦多膾炙人口著有古學齋數十卷家訓和陶集諸書同上

曹文緯字闇冲彭澤人萬曆進士任刑部以建言國本削奪光宗即位贈光祿寺丞崇祀鄉賢同上

劉日曦字馭初彭澤人萬曆進士令江陰值魏璫建生祠日曦遂去官調龍游龍俗苦盜悉捕之一時屏跡改都察院經歷歷南京兵部郎以薦陞浙江參議未任告老日曦素

行嚴毅居家孝友殫心理學尤精大易著有時習錄鏡心錄易經通解同上

周禮嘉字體亨彭澤人萬曆庚子鄉薦以萬安諭知江津值奢賊據渝郡邑望風披靡悉眾攻津禮嘉焚香告天廣募鄉勇竭力守禦卒保全孤城隨以監軍同秦良玉用計擒賊恢復全省序功應詔入京值魏璫勢焰遂致任歸田人咸服其清潔卒年六十有五子易象崇禎壬午舉人同上

洪維幹字禎南萬曆舉人知桐梓時奢酋亂維幹先遣家屬歸募兵死守有叛戍陳大義等為內應遂致城破縛維幹說降不屈賊先斬兩僕以懼之不為動惟欲坐正堂而死賊許之乃衣冠北面再拜被害事聞贈尚寶司正卿同上

邢士俊德化人萬曆貢生幼孤事母以孝好學通諸子百家

性恬靜寡慾有父同榜現任九江招士俊至贈以金辭曰餽粥尚可自給不敢以私交玷公清議也自後不再往見其介操如此同上

黃學詩號起我德化人為諸生有文名教家嚴肅鄉里推為長者年八十八郡守舉鄉飲禮敦請大賓乙酉兵氛與妻熊氏同遇害時年九十有一熊年八十八矣子開先號竹坪府學廩生為人樂易坦懷居鄉好急人之困文行一如其父以子雲師貴封刑科左給事中卒年七十有二同上

文士弘字元任德化人篤好理學中夜輒披衣起坐湛然深思如此者三十年尤精周易別有神解為嚶鳴會館孟月九日為大會每月四日為小會聚徒講學聽者常數百人更以別業創建陽明書院崇禎三年巡按御史葉成章特

疏以師儒薦奉旨未拜以子理嘉興滿考封文林郎年六十四卒學者私謚為安節先生 同上

余朝相字君卜崇禎進士初知吳江縣歷官廣西提學晉秩巡撫少司馬端方恬慎居官清譽所在彰聞後崎嶇亂兵間共濟艱險改名心度隱峒獠不出 同上

趙光抃字彥清德化人父贊化工部郎中光抃舉天啓進士鄉人曹欽程父事魏忠賢驟得太僕少卿光抃語之曰富貴一時名節千古君不可不審欽程惡之明日即出贊化為南寧知府贊化以南寧惡地佗僚而死光抃奔喪歸崇禎初服闋除工部主事歷兵部郎中時軍事旁午光抃才氣豪邁應之有餘閱薊遼戎務周歷數千里盡得邊塞形勢戰守機宜列為十二事以獻

大清兵入密雲總督吳阿衡敗沒代者洪承疇未至廷議增巡撫一人駐密雲遂超擢光抃右僉都御史任之至即發監視中官鄧希詔奸謀帝召希詔還而令分守中官孫茂霖覈實茂霖為希詔解光抃反得罪永成廣東居官甫踰月其後希詔卒誅死十五年兵事益急帝博咨邊才廷臣多舉光抃命赴京陛見光抃家素豐聞命攜數萬金為軍前用入都召見德政殿奏對稱旨拜兵部右侍郎總督薊州諸鎮軍務復召對中左門時我

大清已克薊州分兵四出命光抃兼督諸路援軍發帑金四萬賞功援軍至者甚眾皆觀望及

大清兵南下河間失守不敢救已聞塞上警又疾驅而北御史衛周胤言獻縣交河衡水景州被攻光抃不急救退回

高陽坐視淪覆帝令立功自贖

大清兵北旋光抃合唐通白廣恩等八鎮兵邀於螺山皆敗而走惟火器營以兩監軍御史在焉不動監軍御史蔣拱宸懼并得罪飾詞以報俄鎮守昌平中官以大敗聞帝始惡之既解嚴遂復譴光抃雖文士有膽決嘗遇敵諸將欲奔光抃坐地不起久之乃引歸其起戍中將卒不相習而我

大清兵強甚將士先膽落故所當輒破五月詔奪職候勘光抃嘗薦白廣恩請召見賜宴帝從之廣恩抗命不赴帝以是惡光抃與范志完同日誅福王時太僕少卿萬元吉言光抃受事破軍之餘身先被創與誤國志完駢首西市迄今文武貴賤咸為抱冤給事中熊維典亦以為言乃復其

官

明史藁

按光抃起自戍中正宜興再相時宜興與抃父贊化同年友也以年家子畜之微示己意謂以四萬金進可得永督光抃笑而不應督薊之命遂下薊當極衝比赴任而外圍旋合城中將士素懼怯光抃登城至自執火炬以放礮螺山之役亦由兵勢潰散使然未可概坐失機也爾乃權相中涓交相讒賊俾捐軀任事之人不死於封疆而死於獄吏良足悲矣

傅弘祖號謙宇德化人以選貢倅廬州補倅福州旋致仕歸里平生口吃性喜道說與上官語期期艾艾皆地方大計言不及私迴龍磯鎖江樓封郭洲築長堤皆其所建議郡人永賴其利乙酉兵變遇害

人物志

孫承榮字君貺瑞昌人崇禎恩選入成均司訓浙之仙居無
何仙居缺令以邑事委承榮瘠土洊災民賦習為逋抗承
榮代庖鞭笞不事而井稅視他邑多勸輸再檄署寧海近
地有劇盜嘯聚且千人承榮下車佯言曰此衣中蝨庸足
措吾意忽疾馳單騎率遊徼數卒夜抵其穴擒其渠置諸
理釋餘黨不問盜平而民不知擾兵使者上功幕府疏薦
一時矜為異數循資遷吉安永寧諭方一載間關歸里遂
絕意仕進寄情詩酒以壽終所著有越山清夢秦晉遊略
雪扉齋稿同上

何九達字行可彭澤人以選貢任來安知縣性耿介甘恬淡
居官清慎當事咸呼為先生隨致仕築隱廬有東籬種菊
北海開樽之風卒年九十餘鄉人以德星目之同上

黃堯彩字嗣眉德化人倪文正元璐丁卯鄉試所錄士也崇
禎間謁選除思州府推官尋晉知本府事值猱苗亂妖僧
田文澤起兵應之官兵戰失利堯彩單騎出城四十里集
兵大戰觀音山悉擒之功聞晉湖廣布政司參議分守湖
北道以母老乞養國變避居辰州苗箐五年乃從間道奉
母歸三年卒著有長安詩南歸草黔行集廬游草車中憶
錄猱苗事宜歸田紀略等書同上

喻以恕字心如彭澤人崇禎進士初任工部主事管太倉庫
清釐出納餘羨皆記籍纖毫不以自潤性寡合為忌者所
中左遷浙江處州府司李恬然赴任益勵冰操治城旦書
輒多所平反少貧家無寸產居官終始一節乙酉轉秋官
郎中更大故旋里未一載賫志以終著有硯畬草槿園集

四書詠明詩起古學彙存諸書

同上

鄒逢吉號夔石湖口人崇禎進士歷知武昌臨淄二縣甲申春擢兵垣未踰旬而難作當寇禍之烈也痛哭欲赴死儻從閉之弗得出有一先生鮮衣怒馬翩然來躡足耳語逢吉拒之曰非所望於吾師也其人遜謝以退少焉追呼者至挾以去索篋中裝逢吉從容願就死賊弗聽幽之窟室或勸其食飲却弗御慷慨括髮口占絕命詞飲醜而終一子尋卒鄒遂不祀鄉人祠之

人物志

按吳邦策國變錄死於李賊刑辱者十人逢吉其一也葉承光號咸菴崇禎進士歷知長洲宜興寧國三縣都城不守解組歸隱尤篤孝友賑族人貧乏者年七十卒

府志

孫應龍字見田湖口人曾娶瞽目妻咸勸之易荅曰我棄誰

受負心即負天也且幸有子矣忍乎嘗中副榜復考劣督學嘉其行曰此可風也得貢任合肥訓導有勸娶妾者終勿聽

人物志

張思問號鍾陽湖口人生平不慕榮利惟究心先天理學每有所得則隨書之嘗誦邵子之言曰圖雖無文吾終日言而不離乎是著有理數卦氣圖書聲律等書崇禎九年以孝廉賢能應徵辟隨卒

同上

李獨明字五千德化人爲諸生不屑屑制舉義汎濫典籍崇禎之季徵聘遺逸郡以李名上旋赴主爵當爲邑會寇難不果補乙酉城陷死於兵著有孔子世家七十子列傳禮記改本孫武子集註江上疾呼易象經別諸書

同上

柳清字師伯德化人爲郡諸生隱居洞林山不求聞達嘗以

觴詠自娛歲乙酉偶入郡城遇兵變具衣冠赴府學泮池死焉同上

田化龍字騰岳德化人武藝精嫻有萬夫之勇以將材署南湖營守備時永豐賊熾化龍進勦斬俘無算寇敗潛伏山林孤軍深入被重圍矢盡援絕鏖戰而死永豐人立廟祀之迄今有禱必應府志

董四民九江衛世職百戶總制素繼咸聞其技勇召置麾下題授都司左兵東下調入城防守四民見事急曰吾世受國恩當以死報命其妻史氏妾姚氏並二子溺死於池畢乃登城大呼發矢連斃數人拔刀自刎於城上人物志

徐行可字三山九江衛世襲指揮僉事幼讀書明大義左兵陷城行可母汪氏投井死妻鄒氏婦陳氏繼之行可隨大

書於屏曰世受國恩合門殉節以報投筆北向拜自經於望京門城樓同上

李全昌字文宰德化庠生天性孝友母七十兄弟羣起為壽值歲饑全昌更出米二百斛傳母命賑之母卒喪事備極情禮乙酉左兵東下兩兒百計出重圍全昌夫婦依依母殯不忍離比城破賊蠶擁不得前過陽明祠見火起殺人擾攘中值妻孫氏逃亦至全昌知不免顧謂曰李氏幸不絕吾得死處矣趨入祠就縊孫氏奔赴氣已絕大痛亦投井死孫氏孝廉高山女也兩兒長曰鉞丙午舉人次曰鏞同上

柳鴻字漸于德化人府學生得金谿餘姚二先生語錄遂留心探索於知行合一之旨深有悟入事親尤篤孝道父卒

哀毀幾絕乙酉左兵倡亂鴻以母老莫能行力負潛逃賊
追及不忍捨竟冒白刃而終同上

孫大華德化市民左良玉東下挾督師袁繼咸與之俱袁懼
為所併調兵入城標將郝效忠謀翻城以應左驅其卒乘
夜淫掠民不勝憤多執而殺之次日郝以民激兵變為辭
露刃而噪袁倉卒計窘欲窮詰殺兵者又莫辨為誰大華
獨挺身出呼於市曰殺兵者我也無干於衆遂斬以殉同
上

國朝

文德翼字用昭明崇禎進士司李嘉興平反得釋者甚多大
憇吳中彥子徵雱倚恃持國柄者武斷鄉曲戕害善類德
翼特揭而力討之卒置於理後某府丞具疏汗巖萬狀實

為左袒中彥者修怨也居無何內召秉銓國變作知事不
可為遠遁歛之商山左良玉奔九江以病為辭絕意不還
鎮時督師呂大器實臨之良玉不為禮德翼諷鄖撫王某
曰文武固宜調和亦當存憲體公宜禮敬制閫使悍將稍
知朝廷之尊王領之左乃迎謁成禮交誼屢致激變而綢
繆調護卒無事者德翼之力為多性至孝官司李時父訃
至適在會城即號泣徒跣歸母沒年已望七哀哀若孺子
慕博貫經史長於詩古文詞所著有雅似堂集求是堂集
鐙巖詩集傭吹錄一集二集訟過錄宋史存讀莊小言據
魏學渠所撰墓志

黃雲師號雷岸德化人明崇禎進士授給事中歷吏戶刑兵
四科抗疏甄別京卿凡所指陳詳明剴切為冢宰鄭玄嶽

所器重催楚粵餉題免鄖襄諸郡逋欠三十六萬有奇入國朝隱居蓮花峰下徵辟不赴杜門著述有易裁詩正采榮堂集藏於家卒年七十有六孫圖康熙戊戌進士府志

丁孕乾字爰大德化人在諸生中風流蘊藉絕似晉人獨工於詩與熊兆佳趙映第相倡和清淨遙深力追唐之中葉竟陵譚元春亟推之以明經任南昌學博有十七年詩稿又著閨草及西灣詩話

吳士魁字聚之德化人賦性醇厚方正自持崇禎末年以明

經任浮梁司訓署縣事輯兵安民莫不服其才略閱數月遂解綬歸里性好善老而愈篤鄉飲大賓壽八十子用光亦鄉飲介賓癸卯舉人

廖士貞德化人由舉人任四川營山縣逆賊彭時亨攻城失

陷被執遇害贈四川按察司僉事蔭一子入監安志

閔盾嘉字玉孺德化人順治選貢授福建龍巖縣丞甫蒞任

海賊入寇本邑印官負重疾未視事盾嘉籌餉登埤晝夜守禦時漳屬十邑已陷其九龍巖卒賴以全上臺嘉其功委署安溪武平德化南安諸篆陞延安府同知在任十月以疾卒官著有雪齋蕉夢軒諸文集

周岱生字青嶽德化人由拔貢授貴州餘慶令丁內艱補粵西平南令地不產菜蔬教以播種灌溉之方田荒不闢招撫粵東流民開墾甲寅吳逆叛寇盜蠡起有緱成德為亂

破梧州攻平南岱生率鄉兵出討賊退踰月復至岱生擢甲躍馬斬賊賊攻益急矢且盡義勇戰死者三十餘人岱生退保城浹旬援絕城陷賊繫岱生往得妻楊氏自刎死

賊誘之降岱生厲聲曰何不速殺我遂遇害長子儒且哭
且罵賊並慘戮之次子燻聞變走粵西尋父母兄三屍具
告潯州守守上其事中丞郝浴特疏請卹贈按察司僉事

予祭葬 據安志增撰

西江志卷第九十二

